

察哈爾省通志

宗哲元題

第九冊

察哈爾省通志卷二十

戶籍編

藝文

此卷所錄皆自漢迄明
之文有關國計民生者

擬答北匈奴書

并奏

後漢

班彪



臣聞孝宣皇帝。敕邊守尉曰。匈奴大國。多變詐。交接得其情。則卻敵折衝。應對入其術。則反為輕欺。今北匈奴見南單于來附。懼謀其國。故數乞和親。又遠驅牛馬。與漢合市。重遣名王。多所貢獻。斯皆外示富強。以相欺誕也。臣見其獻益重。知其國益虛。歸親愈數。為懼愈多。然今既未獲助南。則亦不宜絕北。羈縻之義。禮無不答。謂可頗加賞賜。略與所獻相當。明加曉告。以前世呼韓邪。邳支行事。報答之辭。令必有適。今立藁草並上。曰單于不忘漢恩。追念先祖舊約。欲修

察哈爾省通志

戶籍編之十

和親以輔身安國。計議甚高。爲單于嘉之。往者匈奴數有乖亂。呼韓郅支自相讐隙。並蒙孝宣皇帝垂恩救護。故各遣侍子。稱藩保塞。其後郅支忿戾。自絕皇澤。而呼韓附親。忠孝彌著。及漢滅郅支。遂保國傳嗣。子孫相繼。今南單于携衆向南。款塞歸命。自以呼韓嫡長。次第當立。而侵奪失職。猜疑相背。數請兵將。歸掃北庭。策謀紛紜。無所不至。惟念斯言。不可獨聽。又以北單于比年貢獻。欲修和親。故拒而未許。將以成單于忠孝之義。漢秉威信。總率萬國。日月所照。皆爲臣妾。殊俗百蠻。義無親疎。服順者褒賞。畔逆者誅罰。善惡之效。呼韓郅支是也。今單于欲修和親。款誠已達。何嫌而欲率西域諸國俱來獻見。西域國屬匈奴。與屬漢何異。單于數連兵亂。國內虛耗。貢物裁以通禮。何必獻馬裘。今齎雜繒五百疋。弓韃。贖丸一矢。四發遣遺單于。又賜獻馬左骨都侯右谷蠡王。雜繒各

四百疋。斬馬劍各一。單于前言先帝時所賜呼韓邪等。瑟空侯皆敗。願復裁賜。念單于國尙未安。方厲武節。以戰攻爲務。竽瑟之用。不如良弓利劍。故未以齎。朕不愛小物。于單于便宜所欲。遣驛以聞。

諫幸金蓮川疏

金梁襄

金蓮川在重山之北。地積陰冷。五穀不殖。郡縣難建。蓋自古極邊荒棄之壤也。氣候殊異。中夏降雪。一日之間。寒暑交至。特與上京都不同。尤非聖躬將攝之所。凡奉養之具。無不遠勞飛輓。越山踰嶮。其費數倍。至於頓舍之處。軍騎圍塞。主客不分。馬牛風逸。以難收。臧獲捕逃。而莫得。奪攘蹂躪。未易禁止。公卿百官。衛士富者。車帳僅容。貧者穴居露處。輿臺皂隸。不免困踣。饑不得食。寒不得衣。一夫致疾。染及衆人。天傷無辜。何異刃殺。此特細故耳。更有大於此者。臣聞高

城峻池深居邃禁。帝王之藩籬也。壯士健馬。堅甲利兵。帝王之爪牙也。今行宮之所。非有高殿廣宇城池之固。是廢其藩籬也。掛甲常坐之馬。日暴雨蝕。臣知其必羸瘠矣。禦侮待用之士。穴居野處。冷啖寒眠。臣知其必疲瘵矣。衛宮周廬。才容數人。一旦霖潦積旬。衣甲弓刀。霑濕柔脆。豈堪爲用。是失其爪牙也。秋杪將歸。人已疲矣。馬已弱矣。裹糧已空。楮衣已敝。猶且遠幸松林。以從畋獵。行於不測之地。往來之間。動踰旬月。轉輸移徙之勞。更倍於前矣。以陛下神武善騎射。舉世莫及。若夫銜檠之變。猛摯之虞。姑置勿論。設於行獵之際。烈風暴至。塵埃漲天。宿霧四塞。跬步不辨。以致翠華有崤陵之避。襄城之迷。百官狼狽於道途。衛士參錯於隊伍。當此宸衷。寧無戒悔。夫神龍不可以失所。人主不可以輕行。良謂此也。所次之宮。草略尤甚。殿宇周垣。唯有氈布。押宿之官。上番之士。終

日馳驅。加之饑渴。已不勝倦。更使微曙巡警。露坐不眠。精神有限。何以克堪。雖陛下悅以使人勞而不怨。豈若不勞之爲愈也。君人者不可恃人無異謀。要在處已於無患之地也。燕都地處雄要。北倚山嶮。南壓區夏。若坐堂隍。俯視庭宇。本地所生。人馬勇勁。蓋京都之首選也。况今又有宮闕井邑之繁麗。倉府武庫之充實。百官家屬皆處其內。非同曩日之陪京也。居庸古北松亭榆林等關。東西千里。山峻相連。近有畿輔。易於據守。皇天本以限中外。開大金萬世之基而設也。奈何無事之日。越居草萊。輕不貲之聖躬。愛砂磧之微涼。忽祖宗之大業。此臣所惜也。又行幸所過。山徑阻脩。林谷掩靄。上有懸崖。下多深壑。垂堂之戒。不可不思。臣聞漢離宮去長安纔百里許。然武帝幸甘泉。遂中江充之姦。太宗居九成。幾致結社之變。太康畋於洛汭。后羿拒河而失邦。魏帝拜陵近郊。司馬

懿竊權而篡國。隋煬海陵。雖惡貫滿盈。人誰敢議。止以棄離宮室。遠事巡征。其禍遂速。此皆爲殷鑒也。臣嘗論之。安民濟衆。唐虞猶難之。而今日之民。賴陛下之英武。無兵革之憂。賴陛下之聖明。無官吏之虐。賴陛下之寬仁。無刑罰之枉。賴陛下之節儉。無賦歛之煩。可謂能安濟矣。而遊畋納涼之樂。出於富貴之餘。靜而思動。非如衣食切身。有不可去者。罷之至易耳。唐太宗將行關南。畏魏徵而即停。漢文帝欲馳霸陵。袁盎諫而遽止。是陛下能行唐虞之難行。而未能罷中主之易罷。臣所未能喻也。且燕京之涼。非濟南之比。陛下牧濟南日。每遇炎蒸。不離府署。今九重之內。臺榭高明。宴安穆清。何暑可到。議者謂陛下北幸久矣。每歲隨駕大小。前後歌舞而歸。今茲再出。寧有遽不可乎。臣愚以爲患生於不戒者多矣。西漢崇用外戚。而有王莽之禍。梁武好納叛降。而有侯景之變。今

者累歲北幸。狃於無虞。往而不止。臣甚懼焉。臣又聞陛下於合圍之際。麋鹿充
物圍中。大而壯者。纔取數十。以奉宗廟。餘皆縱之。不欲多殺。是陛下恩及於禽
獸。而未及隨駕衆多之臣庶也。議者謂前代守文之主。生長深宮。畏見風日。彎
弧上馬。皆所不能。志氣銷懦。筋力拘柔。臨難戰栗。束手就亡。陛下鑒其如此。不
憚勤身。遠幸金蓮。至於松漠。名爲坐夏打圍。實欲服勞講武。臣愚以爲戰不可
忘。畋獵不可廢。宴安鳩毒。亦不可懷。然事貴適中。不可過當。今過防驕惰之患。
先蹈萬一有危之途。何異無病而服藥也。况欲習武。不必度關。涿易雄保順冀
間。地廣又平。且在邦域之中。田獵以時。誰曰不可。伏乞陛下發如綸之旨。回北
轅之車。塞雞鳴之路。安處中都。不復北幸。則宗社無疆之休。天下莫大之願也。

請會議內塞戍兵疏

明翁萬達

臣聞設險而不守。與無險同。聚兵而失養。與無兵同。蓋險本資人。兵難去食。城朔方者。出六月之車。戍宗周者。班諸侯之餼。其所從來遠矣。近日敵窺隆永。妄有垂涎。上兵伐謀。其次伐形。臣雖愚昧。何敢忘之。其宣府北東路修邊事宜。已經具請見議舉行。臣不敢復有瀆論。但東路雖係加修舊邊。而其地素稱險峻。士衆甚少。原無擺守之兵。北路則係創建內險。藉以屏障神京。事例攸始。宜盡區畫之實。又敵馬素便於架梁。而外兵非可以內掣。今計北路內邊。與東路舊邊相接。約長二百一十餘里。非得二三萬人乘之不可。其奇兵之布。伏於牆外。應兵之接。援於牆內者。尙不與也。則夫東路之增兵。北路之設兵。容能已乎。況今圖事已屬春深。版築未施。壁壘先布。比其完役。便是防秋。改絃更張。勢所不及。除酌調別鎮客兵。以爲奇應。量處本鎮土兵。以爲擺守。客兵數目。調至具題。

士兵供費。隨宜積補外。念惟防邊大役。遣戍重勞。人之常情。不有樂聚。不可使之久居。不有祿利。不可使之履難。聖明御極。百度維新。而經國籌邊。安內攘外。若是其大且重者。苟且便益。不思遠圖。是非臣子揆事慮終。因便審畫。殫心竭力。以事一人之誼也。且近時邊事各有不同。如大同頗易於養兵。而宣府則否。宣府西中路。尙堪以畫守。而北路則難。不可不察。大同之北。水草肥美。無大山谿。宏賜五堡建。而屏蔽嚴。破虎九堡成。而營田闢。倚地可以招軍。籍軍可以乘塞。宣府則谿谷邃密。逼臨敵巢。境土無所于因。屯軍無所于濟。事體有不同也。宣府西中路。素同大舉。戒備有年。故大小白陽。張家口。葛峪堡之間。雖當衝要。兵馬足支。北路則邊連千里。兵不萬人。將校土人。舊所從事者。李莊諸寇而已。此寇既殲。大營遂合。則其事又有不同也。夫今之擺邊。即古之城戍。今之防秋。

即古之更番。宋程頤曰：古者戍役，今春遣行，明夏代至，仍留備秋。過十一月乃歸。其明年復如之。每年秋及冬初，皆有兩番在圍，正謂此也。然三代戍卒皆躬赴所役，捐生產，離骨肉，有至隱痛者，是故出車以勞往，杖杜以勸歸，懇惻撫之，憫其難也。漢則正僱不同，更有三品：曰卒更，身役也；曰踐更，過更皆僱役也；但踐更則人自爲僱，過更則歛應役者之錢，官爲之給戍者，微有不同耳。今擺守不足，勢在增兵，增兵之科，清勾徵調召募三者而已。除清勾籍係正軍，伍爲定額，非戍役者倫，又止徵調召募而已。徵調取之他方，所謂卒更，召募資之土著，踐更過更，無不可也。漢晁錯曰：遠方之人，不知胡人之能，言徵調不如召募也。宋蘇軾曰：錢到民手，未免妄用，言踐更不如過更也。夫宣大之地，古材武之地也，其俗剽悍，其人勇烈，誠即給之器械，厚其糧廩，使伍什隊司以相攝，親識鄰

里以自占。拔其豪傑者。以爲之長貳。結其富力者。以防其逃亡。盛兵可集也。但國家財力有限。軍旅事殷。一編令甲。待哺爲常。介冑之臣。敢忘度支之恤乎。雖然禦戎重事也。以捍蔽神京。至計也。往年太原告急。內邊設險。紫荆倒馬之間。尺列寸守。其直隸河南山東之民。不有寧也。自宣大之邊成。併守之議定。歲省公費六十餘萬。其私於民間者。不能計也。真定保定河間諸府之民。有弓箭之社。技藝之名。但使厚其資發。勤其撫循。則雖徵調爲守。如漢之卒更。亦不爲過。而况議其僱役也。究而論之。招募而不清勾。則失之於彼。而取償於此。既非爲政之體。去者倖免。而來者不拒。又難服衆之心理。有未通也。清勾而不招募。則擐甲厲戈之實缺。而勝衣趨拜之名存。納官字孤之典明。而投石超乘之技乏。功有未副也。至若徵調雖可以濟用。而力役不堪於持久。行者接踵于道塗。何

以有息肩之望。居者疾首于瓜代。何以遂寧居之私。勢有不行也。故嘗繆爲之酌曰。初事必資於徵調。所以隸時。少緩必藉之招募。所以一効。究竟必歸之清勾。所以復額。以政理較之。則徵調不如招募。招募不如清勾。取諸民者。有煩省也。以事勢較之。則清勾不如招募。招募不如徵調。措之用者。有蚤暮也。故徵調以月日計。招募以歲年計。清勾以數年計。然則東北路之乏兵。不得不以徵調濟目前。招募清勾。求善後也。夫宣府兵額。固九萬餘矣。今實在者。十之五六而已。逃亡之數。隱射於因循。捕解之方。脫漏於賄賂。欲求無損。何可得也。故又不得不議清勾。以求復額。事招募以足清勾之不獲者也。然是二者。事無專責。則但具虛文。督責太嚴。則外生他事。竊見副使魏尙綸。現理朔州道兵備。才識資力。良可付託。若以二事責之。使得久任。以求實功。當必大有就立。且事有專責。

而亦不至于外生他事也。臣本愚暗。復處軍中。鮮僚屬士人。共相商確。前項事宜。直述鄙見。伏乞下之廷臣。會議可否。庶事有定方。責效爲易也。

上封貢便宜八事疏

明 王崇古

今日之事。不當以馬市例論。嘉靖中。俺答擁衆入犯薊鎮。執馬房內臣楊淮等。脅以奏開馬市。先帝不允。而命咸寧侯仇鸞將兵撻伐。鸞出塞無功。懼鹵復至。潛以金帛媚鹵。仍許請開市。以道己責。當是時。鹵勢方張。開市之請。非其本心。繇逆鸞私謀。故不旋踵而叛盟肆掠。爲患益甚。先帝震怒。始寘于辟。嚴爲之禁。明旨具在。臣等敢冒請。以干大辟哉。顧今北情實與昔殊。鹵連歲入犯。固多所掠。乃其所亡失。亦略相當。又我兵出境。搗巢趕馬。彼亦苦之。是鹵固非昔之強也。曩者戴天朝歸孫之恩。既獻俘闕下。復約其弟姪并各部落。誓永不犯邊。又

非如昔之擁兵壓境。挾我邊臣而坐索也。且聞鹵欲圖瓦剌。蠶食西番。慮我軍議其後。故堅意內附。以自固。其情可信。又鹵使云。所請市。非復請馬市。但許貢後容令貿易。如遼東開原廣寧互市之規。此國制待諸部之常典。非昔馬市比。臣等以爲使先帝在。亦必俯從無拒也。且昨歲秋防報警。京城戒嚴。至倡爲運甄聚灰。塞門乘城之議。幾爲鹵笑。今鹵既納款內附。乃必欲定久要。守尺寸。以幸百年之無事。異日有失。究首事之罪。是豈惟臣等所不能逆覩。即俺答亦恐能保其身。而不能保其弟姪。能要諸酋于目前。而不能制諸酋于身後也。夫拒鹵甚易。執先帝之禁令。責鹵罪之難信。可數言而決。鹵必憤憤去。即以遣降之恩。不犯宣大土蠻及三衛。必歲糾俺酋父子爲聲援。以窺薊遼。則吉能子弟賓兒諸酋。必爲蘭靖洮河之患。九邊騷動。財力困竭。雖智者無以善其後矣。若允

鹵封貢。各邊有數年之安。可乘時修備。彼設背盟。而以蓄養之財力。從事戰守。不猶愈於終歲馳騫。自救不暇者哉。臣等又歷稽國朝北部。舊有通貢之例。如正統初年也。先以尅減馬價。而稱兵。裔鹵封王。亦有太平賢義安樂及哈密忠順王。故臣等酌時勢。稽典制。以爲許封貢便。因條爲八事以聞。一。議錫封號官職。諸酋輩行。惟俺答爲尊。或可錫以王號。頒給印信。如忠順王及西番諸國例。俾號召其弟姪子孫。爲國藩籬。其餘大枝。如老把都及吉囊長子吉能。俺答長子黃台吉。俱宜授以都督職銜。如三衛故事。其他弟姪子孫。如兀慎打兒漢等四十六枝。雖衆寡強弱不齊。俱宜授以指揮職銜。其俺答諸壻十餘枝。各須授以千戶。如把漢那吉阿力哥近例。皆賜冠服。俾知臣禮。假名器以臣服強敵。在朝廷無大煩費。而大小酋首。可使無復犯邊。一定貢額。裔鹵入貢。名雖效順。而

實希賞。今宜定制。歲許一貢。每貢俺答馬十匹。其使十人。老把都吉能黃台吉各八匹。其使各四人。其諸酋貢。各以部落大小爲差。大者四匹。小者二匹。其使各三人。通計歲貢馬不得過五百匹。其使不得過百五十人。馬分三等。以上馬三十四匹進御。餘馬給價有差。老瘠者不准充貢。其使歲許六十人進京。餘留待境上。使還之日。聽以馬價市買繒布諸物。分給諸酋。以爲酬賞。其欽賞之額。聽禮部查照三衛及西番諸國事例頒給。一。議貢期貢道。鹵入貢互市。宜以春月馬弱之時。且及萬壽聖節各部來庭之會。其使馬匹及表文。自大同左衛驗入。量給犒賞。應駐邊者。分駐各城。及送赴各鎮撫驗賞。應入京者。差官押送。自居庸關入。繇昌平進京。赴四裔館安置。並禮部照例管束給養。事完仍差官繇原途押回。所過地方。各將領盛陳兵仗。示之威重。所駐公館。內外防範。不許姦徒

交通傳泄。郵傳廩餼。一如故事。其經過驛城煩費。每年聽各撫臣議補。一議立互市。北部散處漠北。人不耕織。地無他產。鍋釜繒絮之具。咸仰給中國。今既誓絕侵犯。故其使即求互市。庶免盜竊。非謂求開馬市也。其互市之規。宜照宏治初北部貢例。鹵以金銀牛馬皮張馬尾等物。商販以緞綢布疋鍋釜等物。擇日開市。令其酋以三百人駐邊外。我兵五百駐市場。以資貿易。期盡一月而止。各鎮商貨。不足交易者。聽行各道查發。其客商所易馬匹。或各營收給原值。或聽販賣各鎮市場。在陝西三邊。已有先年原立場堡。其大同應於左衛迤北威鹵堡邊外。宣府應於萬全右衛張家口邊外。山西應於水泉營邊外。聽各將領及兵備道經理。每值互市之期。商人及官軍。不得闌出禁物。交通罔利。及搆起邊釁。罷市之後。有蕃騎近邊索擾者。行俺答及酋長查究。但有賈到各酋長番文。

乞討諸物。量議給發。如其情變詐。軍門議行責問戒備。其各鎮仍襲通鹵夙弊者。重治之一。議撫賞之費。各鎮每年四時戒備。則有調遣客餉。春秋擺邊設防。則有行糧料草。各營有探哨夜役行糧。各墩有常料行月二糧。爲費不貲。且一歲之間。軍丁或零斬寇級。或被寇傷死。所以犒賞優卹之具。皆以督撫絀贖。及各城商稅地租等銀給用。每歲亦不下數千金。今既許鹵通貢。則前費俱可省減。以爲撫賞各部之需。此外不足。每鎮先于年例客餉內。動支數千。俟待撫賞。其使及守市北兵。其兵人布二疋。酋長緞二疋。綢二疋。以好至邊者。酌量來使大小。量加犒賞。今歲撫賞餘銀。即充來歲支用。積之數年。客餉或間歲可省。或歲可半給。因可以節內帑。一議歸降。朝廷懸招降之例。以開華人歸正之門。各邊收納眞裔。以充家丁衝戰之用。行之既久。每年被獲華人。歸正者十七。而眞

裔避罪來降者十三。在華人固無外志。而真裔每詐降。誦我虛實。爲敵嚮導。今既許通貢。以後投降真裔。不分有罪無罪。俱免收納。以杜其酋之索擾。其華人被獲歸正者。查審別無盜竊鹵中財物婦女。及被獲年月籍貫。鹵中主家。乃許入邊。騎來馬匹。收住邊堡。如有北騎來追。卽以原馬給去。人量與綢一疋。布二疋。無事不得招降。以啓邊釁。一。審經權。塞外之於中國。有順有逆。帝王制禦之策。有經有權。經以制禦之。而無妄生事。庶常勝之勢在我。狡寇無所乘其隙。權以羈縻之。而不拘文法。庶操縱之機可決。邊臣得以效其謀。至於目前之利鈍。日後之變態。其始固當預防。其終誠難逆覩也。曩俺答納款乞封。至今邊塵不聳。在彼實有呼韓款塞之誠。在我當有優遇受降之禮。今議者必欲嚴其始之峻防。以要其終之不變。固爲守邊之經。然臣等歷考古昔春秋之列國。漢唐之

封建。雖中國友邦同姓。不能守法信度。而欲責之塞外。恐非達權之宜也。今俺答年近七十。其弟老把都子姪黃台吉吉能。各年逾五十。皆非昔強壯時。倘各曾未死之年。那吉繼承之後。邊境有數年之安。則宣大山西殘破之城堡。可漸充實。荒蕪之屯田。可漸開耕。江西延寧之大邊。可漸脩葺。薊鎮邊臺既脩。腹裏城堡亦漸增築。主兵既練。入衛之兵。亦可漸減。各鎮練兵設險。積餉除器之務。靡不豫圖。數年之後。兵氣振揚。邊備嚴整。縱鹵有反側。我固有以待之。以守可固。以戰可勝。是不失經常之守。而所省財力。且無算矣。雖暫假爵職之名器。而予榮錫之恩。每歲暫借客餉十之一二。爲撫賞酬貢之費。是一時羈縻之微權。而保固疆圉。生全邊氓。不多乎。釋此不事。則拒鹵甚易。而滅鹵甚難。敵東西騷擾。我遠近戒防。士馬疲於奔命。財力匱於徵輸。非計之得也。一戒狡詐飾言。今

之爲將者。平居旣無料敵之智。敢戰之功。及聞鹵納欵。率務爲誇誕。陰肆傾擠。以爲將可恃戰。不宜聽鹵和。以沮其氣。然自二三年來。寇屢犯宣大。未聞與敵一戰。惟規避欺罔。間出搗巢趕馬。所獲旣不足爲彼重輕。而滋疆場之擾。搖奪國是。重誤邊計。罪可誅也。請敕九邊將領。戒平時驕悍之習。乘今糜鹵之暇。務實脩備。使彼知我之有待。不敢復叛。彼或陰懷異志。則揚兵伐謀。使彼不能乘我之虛。數十年之後。中外安堵。邊備增飭。則錄其功。倘或挑怨搆釁。弛備疎防。則治其罪。今有造言飾詐。陰壞貢議者。罪之。庶貢議不沮。而邊事可無患矣。

再論封貢事宜疏

附

明 王崇古

頃者。會議封貢事宜。有與臣原議未合者三。始臣謂套部。應聽陝西督撫另議封貢。而陝西總督王之誥。又復執議。俟吉能子姪二年不犯。方可聽許。臣以爲

俺答吉能。親爲叔姪。勢若長蛇。首尾相應。今許俺答封貢。而不許吉能。在俺答必將呼吉能之衆。就市於河東。宣大之商販。必不能給。在吉能必將糾俺答之衆。窺犯陝邊。而陝西四鎮之憂方大矣。且北人性急而恥卑。今吉能在俺答子孫中。班行年齒既尊。而獨不預封職之榮。入貢之賞。必發憤而爲寇。今日封貢。必不能保其不發也。故封貢之議。在吉能不可獨拒一也。陝西三邊互市。臣原議聽彼中督撫舉行。今督臣之議。謂三尺童子亦知不可。且謂昔開馬市。致套部轉弱爲強。是聽諸將狡飾之說。而未究套部先後之勢也。嘉靖初。吉囊盛強。爲九邊患。自吉囊死。且二十年。部落既分。生齒日衆。而各鎮又多畜丁壯。時搗其巢穴。終歲不能寧居。雖未甚弱。固非益強也。其所需于中國者。緞布鍋釜之類。視各部皆同。而不容互市。諸酋豈甘心伏首聽命。不掠不市已耶。是教之叛

盟而勒其必犯也。且鐵鍋爲鹵炊爨之需。今與之衣而不與之器。彼衆何能自贍。或謂鍋爲兵刃所出。不可資敵。不知鹵雖得鍋。不能鍊鐵。否則遼東開原建寧以廣鍋爲市。蓋廣鍋生鐵。不受砂鍊。或可做行。此互市之議。陝西必不可已。二也。撫賞之資。臣前議暫借客餉。每鎮三五千兩。佐以各鎮撫賞之公費。或可充用。科臣謂臣議動客餉。必至減兵弛備。是未知邊餉主客之異也。夫主餉以養主兵。誠不可減。客餉備春秋有警。調遣兵馬之費。連歲邊報頻仍。四時戒防。糜費鉅萬。今鹵旣納款。則調遣可罷。哨探可減。其歲省客餉。且將無算。故欲于客餉內。動支三四千金。是省十而用一。非他所有費也。討賞濫賞之費。在臣等自知撙節。但守市遣使。出入往來。非此無以示好。故臣請于客餉中。動支萬金。以備互市撫賞之費。或給商販。令易貨充市。以濟公。此撫賞之費。必不可省。

三也。其他如脩築邊堡。選練兵馬。開墾荒田。嚴飭邊備。臣已申令再三。及時自治。即令各鎮脩舉。乘時戒備。及互市之防範。鹵中之戒諭。臣督行各鎮。撫加意經略。惟陛下念邊臣任事之艱難。稍寬文法之牽制。率下所司。定議舉行。

議把漢歸降處置事宜疏

明 王崇古

今聖武布昭。黠鹵效順。殆天意非人力也。顧事係國體不細。臣熟計之。有三策焉。俺答橫行塞外。幾五十年。威制諸部。侵擾邊圉。今神厭凶德。骨肉離叛。把漢那吉。千里來降。宜給宅舍。授官職。豐餼廩服用。以悅其心。嚴禁出入。以虞其詐。若俺答索取。則因與爲市。責令縛送。板升諸逆。還被掠人口。然後以禮遣歸。策之上也。若遂桀驁稱兵。不可理諭。則明示欲殺。以撓其志。彼望生還。必懼我制。其死命。志奪氣沮。不敢大逞。然後徐行吾計。策之中也。若遂而不求。則當厚加

資賞。結以恩信。其部衆繼降者。處之塞下。卽令把漢統領。略如漢制屬國。居烏桓之制。他日俺答死。子辛愛必有其衆。因加把漢名號。令收集餘衆。自爲一部。辛愛必忿爭。彼兩族相持。則兩利俱存。若互相讐殺。則按兵相助。彼無暇侵我。遂得休息。又一策也。臣日夜度鹵之狀。不出此三端。爲吾應之之術。無踰此者。若循舊例。安置海濱。使俺答日夜南望。侵擾不已。又或給配諸將。使之隨營立功。彼素驕貴。不受驅策。駕馭苟乖。必滋怨望。頓生颺去之心。終貽反噬之禍。均爲無策。惟陛下集諸臣裁定可否。

請許俺答封貢疏

明 王崇古

俺答雄據漠北。保我叛人。掠彼番部。有衆十餘萬矣。東結朵顏三衛爲嚮導。西挾吉囊子孫爲羽翼。常首禍謀。今把漢激小忿而來降。黃台吉謀內鄉而見挫。

老酋悔禍。投誠納款。此天時也。臣聞國初時。嘗封鹵爲忠順王。近事則西番諸國。亦各有封。請得許俺答比諸國爲外藩。定其歲貢之額。示以賞賚之等。長率衆酋。以昭聖朝一統之盛。官黃台吉等。以結其父子祖孫之心。歸我叛人。翦其羽翼。亦中國之利也。今鹵中布帛鍋釜。皆仰中國。每入寇則寸鐵尺布。皆其所取。通貢之後。不可復得。將不無鼠竊之憂。若許通市。則和好可久。而華夷兼利。他邊如遼東開原建昌肅州西番諸夷。皆有市。乞其倣制。刻日平價。申禁防姦。以和其交。事宜無不可者。惟上亟賜裁決。以安疆場。

奏上令總督鎮巡官詳悉覆奏賜把漢綵緞四表裏

布百疋遣之歸是年十二月鹵執我叛人趙全等來獻崇古受之獻俘于朝上命奏告郊廟磔諸逆于市內外有功諸臣恩賚各有差

論俺答請封通市疏

明 王崇古

俺答自得孫後。遣使來謝。且乞表式請封。但言吉囊大把都來與盟。疑有詐。臣

未之許。蓋老把都俺答親弟吉囊之子。吉能等皆親弟姪。而兀慎擺腰永邵卜
哆囉土番等酋。又多其本統親枝也。俺答於諸酋爲尊行。力能合之。必同心內
附。然後可假以王封。官諸酋長。比三衛。示羈縻焉。第俺答以爲土蠻故土也。力
不能致。臣聞老把都與土蠻善。而內親黃台吉。適黃台吉使來。臣令其約老把
都以招土蠻。如其來也。可以破三衛交構之私。即不來。則失俺把諸酋之助。其
勢自孤。卽今秋之寇。但能螫遼左。則不敢南窺矣。今俺答與老把都吉能永邵
卜諸部。各遣使十八人。持番文來。言諸酋感聖朝曠恩。願相戒不犯邊。專開貢
市。以息邊民。第諸邊將士習燒荒。尙搗巢。恐妨大信。願明禁約。以結盟好。惟陛
下與諸臣計之。

再與王崇古論貢市書

明高拱

來諭四事。區畫周悉。僕熟思之。可從無他議者一。可從而有議者二。難從者一。夫與之以印。使其相傳爲重。此可從而無他議者也。用廣鍋不用潞鍋。用以充賞。而不用以開市。庶有限制。而彼不可多得鐵。其爲諸親乞賞所宜給之。然須議爲定數。每歲爲常。以後不得再行添乞。庶絕他日之紛亂。此可從而有議者也。至於夷使之入。本無關係利害。而又可以慰俺酋之心。奚不可者。但鹵終不渝盟之理。而但有形迹。即據以苛責。乃我中國縉紳之故態也。今只在外處分他日渝盟。無可說者。若令之入。則或有渝盟之時。必以爲釁由此起。故直厚賞以遂其豔利之心。而不必令入。乃爲穩妥。此非以處鹵人。乃所以處中國之人也。處中國之人者。乃所以爲公他日處也。而可不審慮之哉。若夫老把都之婦。既有異心。則任其颺去。彼既不貢。吾亦不市。彼如作逆。吾嚴兵以待。有戰而已。

切不宜委曲遷就。招致其來。蓋天下之事。人有求於己。則重。己有求於人。則輕。爲一會所輕。則諸會皆輕之。而攬持要素之事起。欸順反不得永矣。况諸會皆在伏順。而此一老婦。又何能爲。吾加厚諸會。而於吉能之喪。恩禮皆備。此老婦者。置之不理。亦不以一言相通。故示絕之之狀。彼自必無意思。搖尾乞憐。吾乃始數其罪而容之。則伸縮之機在我。自可以制馭諸會。不然便任其去。亦無害也。大抵公意欲得此事完全。恐有破綻。僕則以爲必有破綻。而後可保其完全。彼若全順。吾全禮之。彼若全背。吾全不禮。彼若有順有背。吾則有禮有不禮。做成此等規模氣象。使彼常有恐失榮利之懼。而吾則加厚撫賞。又有以悅其心。如有不馴。便少加頓挫。以示不甚緊要之意。斯爲羈縻之理。若就中過爲委曲遷就求全。則其機在彼。勢翻難久。而使人退有後言。他日反作奸人之話柄。破

綻孰甚焉。惟公其裁之。

與宣督王崇古論封貢第二書

明 張居正

今之議者。皆謂講和示弱。馬市起釁。爲此言者。不惟不忠。蓋亦不智。夫所謂和者。謂兩敵相角。智醜力均。自度不足以勝之。故不得已而求和。如漢之和親。宋之獻納。是制和者在夷狄。而不在中國。故賈誼以爲倒懸。寇公不肯主議。今彼稱臣納款。效順乞封。是制和者在中國。不在夷狄。比之漢宋。萬萬不侔。可謂之通和。而不可謂之講和也。至於昔年奏開馬市。官給馬價。市易胡馬。彼擁兵壓境。恃強求市。以欸段駑罷。索吾數倍之利。市易未終。遂行搶掠。故先帝禁不復行。今則因其入貢之便。官爲開集市場。使與邊民貿易有無。稍稍爲之。毋得闕出中國財物及應禁者。其期或三日。或二日而止。如遼東開原事例耳。又豈馬

市可同語乎。且此事有五利焉。鹵既通貢。邏騎自稀。邊鄙不聳。穡人成功。一利也。防守有暇。可以修復屯田。蓄吾士馬之力。歲無援兵。可省行糧數十百萬。二利也。土蠻吉能。每借俺答以爲聲勢。俺酋既服。則二酋不敢輕動。東可以制土蠻。西可以柔吉能。三利也。趙全等既戮。板升衆心已離。吾因與鹵約。有願還者。必勿阻之。彼既無勾引之利。而又知鹵之不足恃。則數萬之衆。皆可漸次招徠。豐州之地可虛矣。四利也。彼父子祖孫。情乖意阻。胡運將衰。其兆已見。老酋死。家族必分。不死。必有冒頓呼寒之變。我得因其機而行吾之計。五利也。凡此五利者。古之謀臣策士所爲禱祠而求者也。而今之議者。獨以邊將不得搗巢。家丁不得趕馬。計私家之害。忘公室之利。遂失此機會。不爲國家審圖。故僕以爲爲此言者。不惟不忠。蓋亦不智甚矣。至於桑土之防。戒備之慮。此自吾之常事。

不容一日少懈者。豈以鹵之貢而有加損乎。今吾中國親父子兄弟相約也。尙有不能保其不背。况夷狄乎。但在我制御之策。自合如是耳。豈能必鹵之不吾背。數十年來。無歲不掠。無地不入。豈皆以背盟之故乎。即將來背盟之禍。又豈復有加於此者乎。利害之歸。較若黑白。而議者猶嗷嗷以此爲言。故僕又以爲不智甚矣。劉侍御既知此事顛末。又與公同心。必能共襄大事。幸採取其議。折以高見。圖上貢額。貢期市易事宜。當備聞於上。請旨行之。浮議雖多。不足惜也。

屯田四議

明 李仙嵐

一。衛所轄軍。州縣轄民。腹皆州縣。而錯以衛所。邊皆衛所。而錯以州縣。民之產爲田。軍之產爲地。每衛五千戶。每所一千戶。戶受地各有數。而總謂之屯。今查宣鎮諸衛所。除三州縣外。則皆屯地矣。其後軍不能耕而招商種。商不肯種。而

招民種。於是。有團種。有地畝。有功臣香火驛。傳公務。有新增餘地。諸名。各就其時所清理者而名之。其實皆屯也。屯之名更。而屯之額乃失。今尋屯額。而不抹此名。所以畢世無屯足之期矣。可考者。正統時通鎮屯地。四萬六千餘頃。徵糧二十五萬有奇。至隆慶初。通鎮諸名地。四萬七千餘頃。徵本折二十二萬有奇。雖糧視原數。多少有差。本折有易。而地則增而有加矣。幅員如故也。奈何釋諸名地而求屯。求之不得。砂磧沮洳。不毛窮髮。盡可指以爲屯。無惑乎募墾之令。終築舍也。此屯田沿革之大較也。一。國初建立衛所。分軍七爲耕。三爲守。原以耕濟守也。不可耕之地。未有建立衛所者。獨開平一衛。爲上谷最衝。今所分爲上北路者。轄一十城堡。崎嶇于重巖疊嶂之中。卽益以雲州所。而可耕之地。劣於中路。以龍門亦衛也。而劣於下路。豈一衛一所。不敵二所哉。深究之。開平衛

原不在獨石。自二邊出口。歷羊川墩外。至舊開平。三百餘里。盡是平川。土膏肥沃。乃知最衝之封。亦自占絕勝之勢。惜乎其棄於塞外也。今鎮寧仍存五所之名。而糧地非舊制也。如獨石馬營。多是前監牧馬草場。而該衛之地。不獨無屯額。併無屯可額也。溝岔之中。掇拾零畦。原非屯數。而徵糧比於他處。不異焉。何怪乎招之來。而適以麾之去也。竊見一鎮折色。有六錢一石者。有七錢一石者。惟道屬皆八錢。必當時市價之定評。亦此中從來固已貴於他處矣。然此中土著無多。而土著之人。從來不習耕。凡戮力於南畝。皆山右之傭。秋去春來。如北塞之雁。所爲斯倉斯箱者。亦晉民之魁。土著寄命於其手。高下時價。任其粟死金生。然有利竭蹶而趨。無利掉臂而往。宜拋荒之愈多。今欲墾荒。當先集流募軍。尤當先講。所以使流頓集。而軍應募也。不然。官受軍屯。軍屯之不。寄得不督。

於軍民又將舍己之私爲公從事。顧此失彼。通融籌算。數未嘗增。似不可不慮及也。一查先年開屯。率於順聖川一帶。此地原牧馬草場。被敵兵蹂躪。馬往口南。始築城堡耕種。然牧場起自永樂。而洪武初年。亦係衛所屯種之數。歲可收糧石四十餘萬。足官軍一年支用。專設屯田副使經理。如葉文憲時。亦始屯此地。而後及各路。補官牛。置農器。給籽粒。皆摘發軍人往爲之耕。賣其租以買馬。徵其楛以飼牛。公務驛傳之外。尙有易銀以備公用。宏治時。尙書李敏。奏葉盛各路團種。誠爲良規。而近年余子俊。將給種軍人。掣回操守。牛具變賣。地二起科。民既逋糧。馬皆倒斃。然則與屯必須團種也明矣。團種之必摘發軍人也明矣。今所爲團種者。非軍也。民也。卽爲軍。乃祖戎不可脫。而其地乃祖遺之。不可辭。推以予人。人不肯受。力不能種。惟有一逃。人逃則地棄。後人團而種之。名曰

新增任地納糧。止同地畝。乃團種已易爲地畝。而額糧未減。仍納團種之糧。故舊人納糧。新人種地。甚至此人種無糧之地。而彼人納無地之糧。冊籍罔稽。阡陌莫辨。所以今日爲牛糧地。告辨者紛紛。而官卒莫之斷也。不知團種者。官辦牛種而軍耕之。所以每畝起科五六七升不等。及牛種不給於官。則團種之地。與地畝地何別。而地畝地或納糧一二升。或折色一二分。團種則五六七升。何輕重頓懸若此。今查尙書周謙。曾題團種原額外。量與餘田三十畝。仍照余子俊所定。每畝三升起科。則是無牛種而名爲團種者。當在所減也。今不惟無減。而追出餘田。另爲加增。愈增愈不知所底止。似不可不極爲釐正也。一屯事爲經野大政。往多效而近每無功者。何也。計一佃費銀二十六兩。米四石六斗。以每頃二十五石言之。每租四十石。碾米二十四石。若近年價湧。還本尙有倍利。

儻如先年。每石八錢六分。則將以何物還本。此猶曰。官嗇而民豐也。萬一天時人事不齊。而不能必二十四石之入。則價雖勝而本無償。然猶曰。以待來年。又萬一本不發。而但責耕。但取租。如向年團種流弊。今日安能預禁於後哉。此土著之深慮。而宜早爲計也。且今所爲屯本者。曰。無礙官銀也。撫賞餘利。與貨物變價也。夫官銀何得無礙。以爲無礙。則無礙耳。至開銷時。恐有准有不准。若鎮城之駁價。在二十年之後。則無礙者有礙矣。猶曰。有案在焉。惟有撫賞之銀之貨物。既於是日奉制臺之檄。動爲屯田。即於是日奉餉司之檄。交部庫作軍餉。猶曰。申明制臺是遵。獨慮講款時。撫賞亦未可動。恐他日問撫賞者。不止餉司也。初已奉旨。後翻議者。寧直一端耶。然猶後日事也。俱置無慮。而無奈撫賞之銀。有欠在軍者。民者。安能隨取隨至。而撫賞之貨物。盡朽爛不堪。除賞彝人。售

於何處。東作將興。銀不湊手。何以副上命乎。此皆屯政之所宜酌者也。

通貢傳

明焦茲

俺答者。故酋也。先裔孫也。俺答伯兄吉囊先故。有男子四。曰吉能。曰打兒漢。台吉。曰銀錠。把都兒。台吉。曰筆寫契。台吉。吉能二子七姪。有衆數萬。居河西套中。舊東勝豐州地。俺答之弟。老把都兒。昆都力哈。部落三萬。據開平獨石外邊。俺答長子孔昆的祿。辛愛黃。台吉。住興和迤北。其次子黑。台吉。子。曰把漢那吉。生三歲而黑。台吉死。其所生母胡媪者。俺答以事殺之。答妻一克哈屯。以其僕阿力哥之妻。乳那吉。故阿力哥持其家柄。打來孫。瓦喇兀良哈。永邵卜。俱稱小部落。打來孫。依套部。餘駐大同西北。附俺答。東則小王子之裔孫。曰王蠻者。爲四枝。曰多羅土蠻。把都黃。台吉。曰麥力銀。台吉。曰着力兔。台吉。曰克鄧。台吉。擁衆

十萬。恃其蕃盛。與俺答爭強。互有侵犯。爲中國薊遼迤東之害。俺答有控絃之衆十萬餘。精銳者三萬餘。馬四十萬。橐駝牛羊百萬。駐大同宣府迤北。橫行塞外。自嘉靖初年來。歲有侵掠。吉能套部犯陝西延寧甘肅沿山一帶。俺答往來雲中上谷之墟。村城深懸。收保不及者。被圍困攻破。則焚粟。殺丁壯。掠子女金帛而去。有叛賊趙全十餘輩。復誘之。遂謀深入。二十九年。大舉逼京師。四十年。犯薊至通河。隆慶元年。攻屠石州。猖獗特甚。趙全世晉人。至呂老祖以妖術謀不軌事覺。與其黨趙全。李白馨。劉四。趙龍。呂老十。猛谷王。馬西川。及周元。張彥文之屬歸俺答。俺答割地一區處之。因爲城郭宮室之制。升板築垣。遂號板升。其飲食衣服。仍華舊制。所居極壯麗。僭擬宸居。別爲離宮九楹。以奉俺答。全警敏有智略。劉四等亦勇力過人。其後中國無賴有罪者。輒亡命入板升相依。有

趙宗山。穆教清。張永寶。孫天福。及張從庫。王道兒。二十八人。互相糾引。黨衆至數千。時時爲鹵長驅無忌。以全衆熟知險隘阨塞。又華人得先驅諜視。邊將不爲之防。故也。當石州失守。全謂俺答曰。那顏春秋高矣。而行擁北地精兵。那顏一旦捐館舍。衆屬黃台吉。黃台吉諸子素驕悍。勢必奪而分之。莫若以此時據有雲中上谷。東封居庸。南塞鴈門。獨以一面西制晉代。進則飲馬河汾。退則歸重雲谷。謀未定。會邊兵調募四集。鹵人馬道死。遂遁去。隆慶四年。把漢那吉長而慧。俺答善視之。又爲一克哈屯所憐。那吉謀娶兀慎家兔捨金的女。俺答有外孫女。聘襖兒都司。俺答通焉。遂奪取之。襖兒都司恚。將攻俺答。以那吉所聘兔捨金的女償之。那吉怒。謂其奶公阿力哥曰。我祖妻外孫。又奪孫婦予人。天怒人怨。吾不爲若孫矣。吾聞天朝上下有序。尊卑有體。男女不溷。吾往歸之。

而爲我謝俺答。阿力哥懼誅不敢請俺答。遂趣之行。本年十月十日。那吉與其妻比吉阿力哥之屬十人。馬十三匹。息山西平魯城外。將扣關而入。門者難之。那吉曰。我俺答孫也。得罪祖父。故來歸天朝乞降。諜者以聞。開府方公逢時大喜。遽命以甲楯五百騎。導入大同。逢時坐開府見之。遣出。給飲食。宅舍器具悉備。方遣使之督軍少司馬王公崇古所計事。未及聞。會少師張公居正所使卒偵報。張公聞俺答事。卽貽王公書曰。昨有人自雲中來。言俺答有孫率十餘騎來降。未審的否。俺答子存者獨黃台吉。豈即其子耶。何故率爾來降。公何不以聞。若果有此。於邊事大有關係。宜審處之。於是王公方公上其事。下兵部議。授那吉指揮使。阿力哥正千戶。各賜衣一襲。是時俺答旣失那吉。心常思念。又一克哈屯朝夕泣曰。黑台吉所遺孫。幸賴長成。奈何以淫逆殺之。俺答無以應。因

召趙全等計事。全曰：欲得那吉，須厚賄贖之。否則必脅以兵。試發萬人臨城。中國將卒必悉出戰。吾因據其城而索之可也。俺答然其計。五月辛亥，俺答率衆萬餘，駐平魯城之東。張公復貽王公書曰：那吉來降，雖朝廷有道，能使向化。顧此事關係至重，制鹵之機實在於此。頃報俺答臨邊索要，正恐彼委不取，則我抱空質而結怨於鹵。今其來索，是吾利也。第戒勵將士，堅壁清野，扼險守要，使人以好語款之。曰：吾非誘汝孫，汝孫自慕化而來耳。中國之法，得首鹵若子孫者，賞萬金，爵通侯。吾非不能斬汝孫之首以請賞，但以彼慕義而來，又以汝親孫故，不忍殺。汝欲得之，自當卑詞效款，執吾叛逆趙全等以獻，盟誓於天，約以數年一騎毋入吾塞，方可與汝奏聞朝廷。許汝孫生還。若仍肆其凶逆，稱兵挾取，吾豈畏汝者。今吾宣大之兵，豈復往日之比。汝來則來，吾有以待。且聞汝子

辛愛怨汝愛少妻溺幼子。誘納吾中國叛人。疎其種類。旦夕將謀汝。肘腋之患不虞。而何以汝孫爲哉。彼聞此言。未必不動。公宜堅持初意。審定計謀。毋爲衆言所淆。又曰。老酋臨邊不搶。又不明言索孫。此必趙全等教之。誘吾邊將。兩執以爲質。伺吾間隙。掩其不備。願公戒飭諸將。但併堡堅守。勿輕與戰。即彼示弱見短。亦勿乘之。多行間諜。以疑其心。或遣精騎出他道。搗其巢穴。使之野無所掠。不出十日。勢將自遁。固不必以斬獲爲功也。於是王公方公。悉行近邊將帥。保境收兵。嚴陳以待。時有曙王公乘鹵酋欲孫。因爲市而行搆者。王爲書言之。張公貽書。勸其毋爲衆議所淆。失措畫。棄前功。又貽方公書曰。昨得鑑川書。似爲衆議所搖。頗改前說。誤矣。此事在我。已有勝算。若一旦退縮。措畫失宜。不惟取笑外裔。其害有不可勝言者。鑑川何不慮此哉。老酋爲妻怨恨。欲得其孫甚

急。必不敢逞。但堅壁清野。以老其師。日行間諜。以疑其心。待其心亂氣挫。乃吾用奇之日也。乃復貽王公書曰。頃奉宸斷。此中更無異議。但此事關係重大。須處置得宜。操縱在我。上不失朝廷之體。下可獲柔服之利。乃爲勝算。其使以二十日發去。計今想已得其要領。必如初議。執送趙全等首惡數人。納欵效貢。有番文信使。乃可奏聞朝廷。爲之哀懇。仍加那吉一職。賚以衣幣。禮而遣之。則老酋旣感不殺之恩。那吉亦受中國之命。自可以消其惡毒。懷我好音。邊境之利也。王公乃使善譯語者鮑崇德。入鹵營。反覆告諭。於是俺答慙然悔用趙全謀。仰天歎曰。始吾欲修貢天朝。請封趙全等。謂我有天分。數導我興兵。今我何愛數人頭。不以易吾孫耶。但我北番爨無釜。衣無帛。旣和之後。請各量給爲生。若得請天皇封我一王爵。鈐制諸部。永爲中國藩籬。固幸甚。乃因鮑崇德使人之

王公所言之。時黃台吉以萬騎徧雲中。永邵卜以五千騎走威遠。張兩翼而進。俺答聞之。即下令麾之使退。王公乃條具封事。上言鹵願執叛易孫。請封輸貢。詔許之。一時言官。乃有以爲不便者。有謂和戎示弱者。有謂互市起釁者。衆言藉藉。司馬不能裁決。張公既排衆議行之。又以書與方公王公。計畫邊事甚悉。王公手其書曰。邊事張公見如指掌。吾輩久諳裔情者。多愧之。復遣鮑崇德至俺答營。諭以先執全輩歸中國。爲汝表奏。然後歸那吉。乞封通貢之事。徐任其所欲爲。時張彥文已繫陽和。周元飲藥死。俺答令其麾下哈伍奴柱。襲捕衆賊。二人固俺答嬖倖。自全等用事。二人者日見疎。遂擒趙全與其弟趙龍。及李自馨。劉四兒。猛谷王。呂西川。李老十。馬西川之屬。凡八人。面縛械繫。抵邊城外。是日入雲石堡。十九日送大同左衛。方公令習趙全者。數輩驗其狀。無僞。具內之。

獄三十日出。把漢那吉於庭宴以酒食。出所賜衣以授其使。打兒漢遣行。那吉與其妻泣曰。吾慕天朝。故棄祖父母來歸。獨奈何棄我。方公諭之曰。朝廷以汝祖思汝。故使汝還。非棄汝也。汝歸宜孝順汝祖。懷忠以報朝廷。汝行矣。那吉拜謝去。方公又慮俺吉怒其從行者。因來使丁火力赤猛克。諭以無害。阿力哥二人指邊河誓曰。願以百口保力哥不死。鑽刀示信。後竟如所誓。於是王公上書言趙全等數人本是妖術。背國道。導引內寇。攻城屠殺垂二十年。乃者聖德中興。鹵首懾服。故其孫慕義來降。復蒙待以不死。許之生還。遂使中外一家。永爲內屬。數十年未討之奸宄。一旦繫頸囹圄。臣等擇日械送京師。乞如先朝行飲至獻馘禮。然後下吏誅之。詔下悉如議行。十二月二十日。送趙全等八人。由德盛門入京師。大司寇按全等反狀悉具。上命禮部官爲文詞。告郊廟。戮之東

市支解以徇。其請封通貢二事。大集朝臣。詣闕下會議。有言便者。有言不便者。張公復爲書致王公。言封貢事。乃制鹵安邊大機大略。而時人以媚嫉之心。持庸衆之議。計目前之害。忘久遠之利。遂欲搖亂而沮壞之。僕受國厚恩。死無以報。况處降歟。既以身任之。今日之事。敢復他諉。并言封貢有五利。趣王公圖上貢額。貢期市易事宜。當備聞於上。請旨行之。毋惜浮議。隆慶五年二月二十日。王公上書穆宗皇帝。其略曰。俺答强悍狼肆。於諸酋獨稱雄長。况吉能把都兒。黃台吉皆其子弟。雖土蠻與之角勝。亦托身老把都。自結婚姻。藉其聲援。今羈以空爵。而無兵衛財力之費。臣獨何惜而不爲。但必令其大會衆酋。同表入貢。方可擬封。以彰歸義之榮。仍聽各自爲部。不必假以統攝之權。至於貢市之議。先朝行而不利。蓋其故始於逆鸞。借以媚鹵。故其勢必招釁啓侮。而得志於中。

國。今俺答暮年悔過。且感激朝廷厚遣那吉之恩。納款求封。出於誠悃。豈昔日
兩地爲市。費財玩敵之比哉。鹵若奉職通貢。賜答自有常數。如其叛盟於吾。撻
伐之威。未嘗少挫。會大同開府劉公。亦言入貢與馬市不同。况俺酋再使懇請。
若重違其意。終阻向化之念。且鷙忿不平。終爲邊害。機會一失。不可再得。張公
又爲書貽王公。言封貢之事。所當經畫者有四。所當修補者亦有四。勸其悉心
籌畫而行之。王公乃爲疏酌其入貢之道。定其獻貢之期限。其貢馬之數。必使
進止之所。縷縷可行。議市場大門。以左衛威鹵堡地。在宣府以萬全右衛張家
口地。山西於水泉營邊。令裨將統兵。憲臣監市。硝黃銅鐵軍器。各有禁約。鹵入
毋持弓矢甲冑。使得與沿邊居民。有無相易。在彼不肆憑陵。我亦應加存恤。往
年燒荒搗巢劫馬。兩相仇害。不得已之厲政。今宜稍寬。以示招携。天子重其事。

復下宗伯議。宗伯具題。成祖廟北部酋長。曾封忠順忠義順寧賢義五王。在往籍可考。俺答之封的。爲有據。疏上。制曰可。隆慶五年四月。俺答遣使奉表稱臣。貢名馬三十匹。上御建極殿受之。使太使奉金冊。封俺答爲順義王。老把都。黃台吉。俱都督同知。那吉仍舊所賜指揮使。其餘小酋長。爲指揮同知者十。爲指揮僉事正千戶者各十九。副千戶十二。百戶二。所賜銀帛衣服有差。俺答大喜。告中國使者曰。趙全等已伏誅。尙遺趙宗山餘黨。數十年據有板升。此輩不滅。亡終敗和約。王公以聞。詔捕讞獄。如趙全等刑。是年秋。套部亦願輸貢。總督少司馬戴公爲言於朝。許其入貢開市。延綏寧夏。悉得市易。如宣大例。報可。賜吉能都督同知官。餘以指揮千百戶受秩者四十九。並賜衣帛。次年六月。今上登極。吉能貢如俺答事。萬曆元年。各修貢事如初。二年。上念王公在邊之勞。詔歸

以大司馬協理戎政。適首事巡撫方公服闋起代王公。以故是年市事復興。諸開府同心共濟。費省慮悉。三鎮晏如。大抵因貢爲市。中國以緞布皮物市易。鹵馬鹵亦利漢財物交易。誠所謂貿遷有無。中外一家。故東西延袤五千餘里。無烽火警。行人不持弓矢。近疆水陸屯田。悉墾治如內地。墩臺哨望之卒。以漸撤去。所省糧餉。歲不下數十萬石。督撫諸臣及時而城邊險。飭器械。練兵馬。倡勇敢。所易馬至數十萬匹。命官設牧。統養待用。在野成羣。誠如雲錦。溯流窮源。運軸轉轂。功益有自云。

宣鎮東路輿圖說

明秦霖

謹按宣鎮爲京師右輔重地。載有全誌與路圖蹟。而茲輿圖之刻也。合南山東路而一之。眎舊誌加詳焉。東路之界。東接昌薊。自火焰山起。南分而西南竟合

河口。中若四海治灰嶺柳溝岔道大山口垣長二百二十餘里。隸之南山參戎焉。其北分而西北竟靖安堡。中若石城峪黑漢嶺周四溝黃土嶺劉斌堡邊墻一百八十餘里。又自永甯城起。西分而西南竟桃花。中若延慶懷來土木沙城新舊保安之屬。紆迴又數百餘里。俱隸之東路參戎焉。夫懷來實四顧要地。火燄山爲神京後屏。薊鎮在左。昌鎮環右。南山崔巍拱抱陵寢。抑何雄也。昔勝國劉秉忠謂萬山起自崑崙。分行八極。乾坤坎離歸絕域。而西通瀚海。良震巽三條入中國。而五嶽分支。遼金史所謂會州之北。有木葉山。南北千里。東西七八百里。委折而南。則萬馬奔騰。瀟漫而抵開平。爲上都。迤邐至大都。則今之京師。卽元大都也。自是隱嶙磅礴。背荒裔而犇中夏。歷獨石馬營龍門。紆徐起伏。爲黃花古北火燄灰嶺柳溝紅門居庸諸山。以擁護天壽。文皇都燕。以此爲右輔。

地則宣鎮東路固爲陵京最要害區也。當北方未欵以前。文武大臣更番禦備。懷來則制院主之。每歲防秋。駐節宿重兵其間。延慶則撫院爲政。永甯岔道則總戎副府分屯。扼要爭奇。無敢少惰。邇來恃欵貢而吟嚙乘積。玩愒因循而鱗介動。此院道府之所爲圖於未形。而修理城郭樓櫓。無甯歲也。霖每奉檄覈工。睹其補救者。增飭者。特勦者。崇墉櫛次。雉堞森如。束跳梁之手足。刮猥噬之肺腸。俾神京享磐石之安。萬邦允賴矣。夫敵國外患。亘古爲然。由臨洮而至遼陽。延袤廣遠。處處爲敵爲鄰。何地無險。何險不可守。顧山川之險。彼我共之。垣墉之險。我獨專焉。專焉彼不分。共者我得所據。亦何外侮之足虞哉。易曰。王公設險以守其國。此之謂也。守者何。積米粟。繕器械。謹烽燧。實士馬。精簡練。明賞罰。數者不可缺一。今之兵籍姓名。支資糧而已。平時議增屯。議招集犒賞。則有兵。

及突出抄鹵。責以爭先馳驟。堵截禦卻之任。則鮮赴也。且其所虛誇張者。選騎耳。家丁耳。居常既無生聚之衛。臨急而即欲多方招募。皆市兒游棍。不可用也。至若全鎮諸路。褒衣博帶。操文墨而游宦者。可屈指數。其飭兜鍪而跣注者。盡土着也。賞延奕世。與國同體。聚廬託處。長子孫於此。則築城浚池。非直爲公。蓋亦爲爾私計也。果其一心竭力。奮身禦侮。以幹濟國家。則外寇雖強。亦何足慮。是惟在長人者。勞以成愛。威以濟寬。重懲貪冒。勿縱詭隨。庶邊方其有豸乎。方今武事寢弛。將驕卒惰。近若援遼之役。一軍甫行。妻號子慟。徘徊畏縮。伺隙思逃。睹此景象。其有能執干戈以衛社稷者乎。有能賈餘勇以赴國難者乎。脫有中行說劉守光之徒。攘臂一呼。真有不忍終言者矣。夫有險不守。與無險同。曩者英廟蒙塵。獨石馬營不守。而六師罹慘。紫荆白羊一破。而九門撓鋒。世廟臨

御四十五年中。宣鎮之受蹂躪。虔劉者。何歲無之。往年汪撫院建鉞宣鎮。籲疏請餉。而寢脫巾之變。審度張家市口。而築來遠城。真所謂扼之吭而拊其背矣。若上西北路之獨石。雲州。葛峪。青邊。大小白羊諸堡。下西南之膳房。柴溝。左右衛。洗馬林。懷安。東西順聖諸城。皆交錯敵巢。素稱衝要。儻盡能以徹桑之心。爲心。聿修邊備。加意隄防。使邊民有生之樂。士卒無死之憂。可不謂功德之鴻鉅者乎。語曰。小人言焉。君子擇焉。是在有封疆之責者。謀野詢芻。取斯圖說而盼睠之。則危明憂盛之念。或於斯不無少助歟。

說居庸關

明 龔 鞏 浙江仁和人

居庸關者。古之譚守者之言也。龔子曰。疑若可守然。何以疑若可守然。曰。出昌平州。山東西道相望。俄然而相輳相赴。以至相感。居庸關在其間。如因南山以

爲之門。故曰疑若可守然。關凡四重。南口者下關也。爲之城。城南門至北門一里。出北門十五里。曰中關。又爲之城。城南門至北門一里。出北門又十五里。曰上關。又爲之城。城南門至北門一里。出北門又十五里。曰八達嶺。又爲之城。城南門至北門一里。蓋自南口之南門。至於八嶺之北門。凡四十八里。關之首尾具制爲是。故曰疑若可守然。下關最下。中關高倍之。八達嶺之俯瞰南口也。如窺井形然。故曰疑若可守然。自入南口。城甃有天竺字。蒙古字。上關之北門。大書曰居庸關。景泰二年修。八達嶺之北門。大書曰北門鎖鑰。景泰三年建。自入南口。流水齧吾馬蹏。涉之琤然鳴。春之則忽涌忽洑而盡態。迹之則至乎八達嶺而窮。八達嶺者。古隰餘水之源也。自入南口。木多文杏。蘋婆棠梨。皆怒華。自入南口。或容十騎。或容多騎。或容一騎。蒙古自北來。鞭橐駝與余摩臂行。時時

橐駝衝余騎顛。余亦拋蒙古帽墮於橐駝前。蒙古大笑。余乃私歎曰。若蒙古者。建置居庸關之所以然。非以若耶。余江左士也。使余生趙宋世。目尙不得覩燕趙。安得與反犛者相戲乎。萬山間。生我聖清中外一家之世。豈不傲古人哉。蒙古來者。是歲克西克騰蘇尼特。皆入京詣理藩院交馬云。自入南口。多霧。若小雨。過中關。見稅亭焉。問其吏曰。今法網寬大。稅有漏乎。曰。大筐小筐。大偷橐駝。小偷羊。余嘆曰。信若是。是有間道矣。自入南口。四山之陂陀之隙。有護邊牆數十處。問之民。皆言明時修。徵稅吏言。吾固知有間道。出沒於此護邊牆之間。承平之世。漏稅而已。設生昔之世。與凡守關以爲險者。有不大駭北兵自天而降者哉。降自八達嶺。地遂平。又五里曰岔道。

棄開平說

明尹耕

按開平元之上都也。灤水繞南。龍岡奠北。東連遼碣。西帶豐勝。蓋形勝之地也。元人以之肇基。成祖北伐。往來由之。東路有涼亭枕河塞峰黃崖四驛。以接大寧。西路有恒州威鹵明安隰寧四驛。以接獨石。巨鎮隱然。屏我山後。遇有警急。則宣遼有首尾之援。居常防戍。則京師得封殖之固。夫國家定鼎北平。不患帶几之無憑。而患於肩背之失恃。大寧既委三衛。開平復移獨石。遂使京師之北。僅存藩籬。漠北遊魂。藉聲黃內。所關豈細故哉。究而論之。則屯田便宜於轉輸。一勞可以永利。大寧要害於開平。易置亦頗非難。夫五原在豐勝之外。沙磧之間。昔人且猶開渠營田。以規全利。何龍岡之沃。灤水之潤。開平獨不可田耶。又失開平則後背雖空。尙有宣府獨石之固。失大寧則左肩全弱。宣遼隔絕矣。故嘗爲薛祿計曰。開平可田。屯田可也。不可田。則易置大寧可也。夫劉秉忠諸人。

皆於開平樹藝卜隱。則開平無不可田之理。開平爲元故都。山水明秀。壞城郭宮闕。而留其民居。以與三衛。則三衛亦無不樂之理。二策無不可就也。土人稱祿馳驅邊塞。悉心經營。然祿知謹於封疆之小利。而昧於夷夏之大防。知懲乎目前之紛擾。而怠乎經世之權變。開平孤遠。不易守矣。而北門單弱之不恤。餉道艱難。不易致矣。而屯田開墾之不求。割棄境土三百餘里。不之惜矣。而易置三衛之不講。此所以效成於一時。而禍伏於異日。恩加於近塞。而謀失於遠猷。智者窮源。不能無慨也。

宣鎮圖說序

明 劉孔允

周官有古險氏。掌九州之圖。以周知其山林川澤之阻。地之有圖。所從來久矣。在邊裔尤急。夫邊裔。我與敵共之者也。險易之弗辨。要害之弗明。彼以飄風驟

兩。駭所不存。雖銅南山猶有隙。敢謂畫地之爲金湯也耶。宣鎮稱肩背重地。舊無圖。其附之於九邊者。志略耳而未詳。其合之於雲中者。詳矣而未辨。至南山之擁護陵寢。所關綦重。亦略而不載。他可知已。余不佞。生於茲地。猥以承乏領鎮。凡山川原隰。屯戍亭障。溝塗之屬。足迹幾半。又參之以目。證之於口。雖無文獻。亦足徵矣。因爲圖說而付之梓。總而爲一。列而爲八。散而爲六十八。以南山諸隘附焉。其間地理之廣狹。形勢之夷險。軍馬之多寡。亭燧之疏密。諸部之遠近。無不具也。至敵人出沒之地。我軍遏伏之衝。特爲拈出。若芻餉。若租賦。若鹽糧。撫賞。亦隨地以載。謂是邊之屬也。不然。則其以邊制者也。方今守在四裔。邊塵不聳。誠無所事此。顧狃不可常。備不可弛。儻爲未雨綢繆之計。則此一圖也。曲折咸具。德裕可藉。以籌邊形在目中。馬援無煩於聚米。或後來君子之所不

廢乎。無以余不類。而並弁髦視之也。

塞語序

明
劉應節

塞語者。尹氏朔野子所爲書也。尹子少習兵事。識兵機。每欲提一旅橫行塞上。毅然負勒燕然。封狼居胥之志。會世廟中葉。天下承平。久諱言兵。即武夫世胄。爪牙肩臂之師。語以韜鈴。莫喻皮傅。尹子慮之。乃述塞語。然則塞語。其有憂乎。夫兵有機。將有權。因敵制變。詭秘莫測。是謂兵機。醮廟而立。扶穀遣之。無從中御。是謂將權。古之名將。得機而神。得權而運。然後從事。四裔而功不殆。是故謀勝於朝堂者。王。伊呂是已。戰勝於封疆者。武。衛霍是已。托言於簡編者。傳。風人策士之流。是已。余觀尹子所謂塞語。審形勢。明戰守。裁今古之變。察彼已之情。逆賭禍福。倚伏之機。明若觀火矣。然而思患周防。如虞突薪。若將弗掇。危詞曲

譬如疾痛之呼人。惟恐弗聞。何爲其皇皇若是。夫總文武者。將之良也。簡能授任。明主之務也。以尹子才。置之帷幄。受以專閫。即伊呂宜未多讓。其功豈遽出衛霍下。乃阨於郡縣。困於簿書。期會之間。竊比風人策士之流。托塞人之語。懷罪我之懼。岌岌焉。幸采於觀風者。所謂詠歌不足。繼以嗟歎。是擾心之感也。故曰塞語。其有憂乎。雖然。摧鋒陷陣。功一劍耳。揮枹決策。功一時耳。藉令尹子樹勳塞上。視塞語孰多。夫兵猶禪也。禪有法眼。兵有妙機。皆未易語。是故任三軍之政。而不知三軍之事。則敗矣。不知三軍之事。而妄語三軍之機。則惑矣。卽令尹子樹勳塞上。而塞語亦安可以無作。於戲。知此則尹子行志匡時。固自有在。何必勒燕然。封狼居胥。而後可以語尹氏子之功。

塞語後序

明尹耕

朔野子既述塞語。憮然有間曰。余罪矣。夫不在其位。不謀其政。余羈伏一榻。寓言千里。則可乎。雖然。生不諱之時。有羣策之屈。聞之於塞居者。而言之於不塞居者。譬之樵人語山。漁子話水。陳其所見而已。無他腸也。是故知彼知己。百勝之道也。則首述鹵情。據險守要。敵衆之術也。則次述形勢。險非人不成。則次述城塞。城非人不永。則次述乘塞。乘塞懼忘戰也。則次述出塞。出塞慮伍失也。則次述抽丁。抽丁必於官軍之餘。故次述官軍。戶有兵。必使知方。故次述練習。然馬不可不蕃也。遂及夫保馬。內不可不備也。遂及夫民堡。事變無常。禍福倚伏。作事圖始。必使可循。故以審幾終焉。千慮一得。實抱惓誠。知我罪我。所不敢辭也。

鄉約序

明尹耕

鄉者何。周制五家爲比。五比爲閭。四閭爲族。五族爲黨。五黨爲州。五州爲鄉。管子內政。五家爲軌。十軌爲里。四里爲連。十連爲鄉也。後世聚民而居。大抵曰鄉。以地則有互武。以社則有粉榆。以俗則有君子。以人則有鄭公。蓋不必五州十連之廣也。約者何。周制比有長。使之相保。閭有胥。使之相愛。族有師。使之相葬。黨有正。使之相揀。州有長。使之相調。鄉有大夫。使之相賓。管子內政。軌有長。五人爲伍。里有司。五十人爲小戎。連有長。二百人爲卒。鄉有良人。二千人爲旅也。後世民居相告戒。大抵曰約。以誦讀則有塾舍。以臧否則有月旦。以備荒則有義倉。以備警則有弓箭社。蓋不必相賓爲旅之大也。是道也以奚始乎。曰。與民生始也。昔皇帝經土設井。一不洩地氣。二無廢一家。三同風俗。四齊巧拙。五通貨財。六存亡相守。七出入相司。八嫁娶相媒。九有無相貸。十疾病相揀。是其始。

也。其所從來遠矣。奚以終乎。曰。與民生終也。漢有三老亭長。以教民孝弟力田。唐有坊村。以檢察不率。宋有里正衙前。以督辦公役。皆其遺也。百世以俟。而不惑矣。今之鄉者何也。曰。以廬舍之比鄰也。形勢之犄角也。耕植作息之無相遠也。則爲之所謂不必於五州十連之廣也。今之約者何也。曰。以版築之必興也。器械之必具也。守禦應援之必相資也。則爲之所謂不必相資爲旅之大也。國制不有鄉乎。族有望。甲有長。里有總。其鄉秩然也。而今何以復。曰。鄉。曰。國制集戶以爲甲。合甲以爲里。丁中有消長。而版編不移。死徙有出鄉。而隸屬已定。籍其常也。今則廬舍之比鄰。形勢之犄角。耕植作息之無相遠。通其變也。國制不有約乎。導俗有誥。飭憲有令。明刑有律。其約炳然也。而今何以復。曰。約。曰。國制誥以厚民生。令以定民志。律以禁民非。其彝訓也。今則版築之必舉。器械之必

具守禦應援之必相資。偏其急也。然則國制何不通其變偏其急而爲之乎。曰。併堡以教守。頒器以利用。懸賞以旌勇。爲之倡矣。而不苛苛誅者。嚴軍政而寬民力也。閭閻將遂通其變偏其急而爲之乎。曰。溺於所聞。安於故俗者。凡民也。若夫豪傑之士。雖無倡之者。猶興難與圖始。可以與慮終者。蓄害不切其身者也。疾病而臨水火。將叫號奔走以求免矣。上有所好。而下不遺。上有所倡。而下終事。先國家之急。而後己私者也。是故廬舍比鄰。形勢犄角。耕植作息。無相違而鄉成矣。版築必興。器械必具。守禦應援必相資。而約舉矣。鄉成則畎畝皆險。約舉則耒耜皆兵。塞以嚴外防。而堡以嚴中堅。兵以戰境上。而民以戰清野。不俟督責之繁。而人自爲力。無須教閱之素。而俗自知方。計無有得於此者。昔嚴尤以周人城朔方爲中策。秦人城長城爲無策。蓋以周知內治。秦專外防。周使

人自守。秦役力已甚也。今國家塞垣際天。設險固矣。而復內治必盡。民自爲兵。視周不上較乎。噫。此鄉約之所以作也。而軍民一體之義著矣。兵農相資之用明矣。首尾皆應之勢成矣。故曰。觀於鄉而知王道之易易也。

宣府鎮志序

明 孫世芳

古諸侯之國。地方百里。咸得署置史官。用司紀述。凡其政教號令。上達天子。旁通方岳冢君。下暨所鄰邊裔。雄長者。舉存之籍。故其國史。實與天下史。可參稽焉。是故以杞證夏。以宋證殷。孔子慨諸文獻。而韓宣子聘魯。即謂周禮盡在。則以有春秋也。曾謂一國之史。邈不與天下事耶。自封建制廢。郡邑守宰。不得署置史官。其政教號令。獨紀述於天子之國之史。苟稍有遺佚。竟將無所參稽。而事係一方。可備省戒者。遂泯不復傳矣。後世守宰。賢者間慮及此。乃推古侯國

置史本意。各以其方政教號令。志於其書。將爲天子之史。補所遺佚而傳之。至今僅一二見。則其時守宰所上最績。可概睹也。宣鎮故幽朔地。軒虞氏已入治區。茲以遐遠不述。卽如置有郡邑以來。凡統於中國天子幾代。專據於方鎮權臣。幾傳。陷於鄰附外裔。雄長幾更部族。而政教號令。隨時變易者。惟其守宰得以奉命下行。乃未嘗彙萃故實而傳之遠。何歟。繫敝攘矯虔之故。日嬰其心。而莫之暇及也。幸賴天子之國之史。欲爲內外峻防。諸凡疆理經營。悉見紀述。故雖不假方志參稽。補所遺佚。而政教宏規。號令大旨。固已燦然具在。可備省戒矣。我高皇帝光復軒虞治區。憫四百年漸染氓庶。徙居庸關南。舊郡邑守宰。盡罷其戍。居兵卒。武吏馭之。要亦一時權宜已爾。太宗乘三駕餘威。圖復郡邑。而鼎成之亟。淵慮未紓。向微仁宣二宗。命憲臣來監。卽政令有所不行。又何敢以

一方文獻責介胄也。憲孝之朝。御史中丞崑山葉公盛。故城馬公中錫。撫監於茲。丕烈訐猷。亦旣奠我邦土。復以其暇。攬一方文獻。薈萃成編。以備省戒。然就中而論。則方輿僅述。法度未詳。甲賦僅存。經書未及。所謂大政教號令。且遺佚失哀。又將何所取藉。備戒世世耶。世芳蚤歲。嘗讀二公前所爲編時。已有概於衷。奮欲綴輯。顧難憂灼心。孤陋楛量。不敢以斯文自詭。叨官吏局而後。進爲役牽。退爲病累。無復有舊念也。庚申之歲。時食於家。御史欒君尙約。過而謀及。則蚤歲所概於衷者。又因而勃然興矣。於是忘其顛蒙。殫其智識。搜羅檢索。先之往代史書。當時制册次之名臣偉議。先儒緒言。又次之。幽人所憤談。譯人所襲講。關世道者筆之。不病於煩。悖時宜者芟之。不病於簡。然後發以義例。標以要綱。著以條章。斷以意見。而志成焉。凡爲考二十有六。爲表有七。爲傳有九。爲卷

四十有二。以明王制。則損益可推。以察天時。則休咎可驗。以別地宜。則夷險可尋。以阜物利。則豐約可酌。以揆文教。則化之隆汙可原。以奮武衛。則勢之強弱可究。以定人之倫品。則其人言行得失可徵。是世芳所謂志也。云爾。昔陳壽夙擅史長。亟爲李延壽稱許。今其史止存紀傳。志未及爲。意蓋慎之。江淹所謂史莫志難之說。信不誣也。世芳幽朔鄙夫。焉敢望古人畔岸。乃於古人所致慎者。冒然爲之。妄作之尤。極知難免。然政教號令。議諸天朝。頒諸方岳。播諸徼外夷裔者。亦旣收錄。則不惟二中丞昔所未逮。得以續成。而天下史賴之參稽者。或於此乎不棄矣。後之君子。儻能訂正謬戾。採掇精微。炳其義於日星。嚴其詞於袞鉞。庶幾備省戒世。世而世芳綴輯初志。所託以傳及者。益又遠也。書院御史王君汝正。董君學。相繼以監治來。遂屬兵憲楊大夫巍刻之。蓋亦取世芳之說。

爲不誣云。

續宣府鎮志序

明 胡以溫

昔鄉先生孫太史。因葉馬兩中丞舊編。而成宣府鎮志。上溯黃虞。下迄元明。薈萃古今。考據典核。其體有六綱。曰昭王制。曰察天時。曰別地宜。曰阜物利。曰揆文教。曰奮武衛。其目有二十六考。大都倣馬端臨文獻通考而爲之。其年表列傳。則一以史漢爲歸。識者謂可與李陔峒。何大復。西安中州兩志相參。今所梓行者是也。然其志至明世宗嘉靖辛酉而止。迄今上康熙辛亥歲。又百有餘載。幾同文獻之無徵。如甲申乃明末清興一大沿革之會。闕而未書。非所云昭王制也。千有餘里內。百數十年之大災祥。闕未書。非所云察天時也。疆域山川。雖猶昔也。今距京師若干里。屬畿內。自何年。闕未書。且塞外久歸版圖。則一邱一

澤。皆我阿我池。闕未書。非所云別地宜也。戶口昔多官軍丁男。今概民籍矣。田土昔皆屯團。今膏腴多非民產矣。賦稅昔皆米芻。後有憑恃城社。割屬改折者矣。皆闕未書。非所云阜物利也。與夫法令之繁簡。風俗之美惡。祠祀之興廢。學校之增損。亦闕未書。非所云揆文教也。兵制自明神宗萬歷以來。已非衛所之舊。迨崇禎末。又無慮數變。迄今屢經裁定。按籍而討軍實。不啻十去八九。蓋因時制宜。勢所固然。皆闕而未書。非所云奮武衛。矧穆宗隆慶已巳。賴王襄毅力主歛市。順義王幡然輯兵。中外享中葉福者。數十餘稔。舊志有征戰一考。繫經略後。此尤當日經略之巨且善者。曷可以闕。至若職官選舉之宜。哀而表者。宦蹟鄉賢忠臣孝子文人節婦之宜。立傳者。皆在闕略。俾閱者第能數往。莫從知來。每念及此。不禁有志未逮之感。閱歲癸丑。恭遇皇上允輔臣請。詔天下修志。

一備一統之採擇。檄行及於茲土。時武進徐公元琪分守口北。以輿人之言。屬草於以溫。辭之不獲。且趣甚速。懼未克竣厥事。爰取檄披覽。見有接古續今之語。乃始恍然曰。予曩有鎮事續略之集。儻有當於萬一。不敢負賢監司之委也。乃檢笥中。與闔鎮諸官長所徵購。桑梓同志所探訪。皆得自碑版。鑿鑿可據者。慎審於衷。載筆而書。事增於前。而卷帙半之。甫脫稿。即索去。聞已達于巡撫中丞臺矣。及閱畿輔通志。吾宣事被採入者。寥寥焉爾。豈獨以邊隅故略之耶。其如屬在畿內何。然而志各有體。在畿輔固無妨於嚴。在宣鎮則不厭其備。雖未敢謬語於賅括考據之義。亦惟弗失前賢之志而已。此溫所爲補輯與續修之本末也。

新建通橋碑

明 賀逢聖

懷來。漢上谷地。唐媯川郡也。漢唐都關中。視此爲北邊。即山川突騎爲中國最。然而較之三輔之近。此猶絕遠。不綦重也。我國定鼎燕山。一望則居庸在目。臨關則懷來在目。一襟帶間。而爲我朝寢廟。肩臂之於人身。寧尺寸乎哉。以故懷來稱重鎮。而聖天子畀璽書來者。皆當世之名賢。無論已。即奔走下風。而受成事者。亦必撥繁吏始往焉。用是節度茲土者。凡山川。城郭。道里。橋梁。土馬。芻餉。之類。無不咨諏精確。號稱允當。夫非人與地之兩重乎。乃其視國事如家事。而屹然建不拔之業。則惟觀察胡公一人而已。先是郭門外。有水從北來。遶城而過。逶迤西去。即所云清夷水也。每當春夏之交。山雨驟而澎湃。地固砂磧。觸人入溺。觸岸岸頽。涉者病焉。望者危焉。前兵憲張公。濟世材也。憫此昏墊。力議建橋。而以陞任去。逮胡公爲政。目擊其艱。規恢舊業。遂慨然以身任之。曰。此不架

長虹橫卻月。更於何處覓津梁乎。遂次第請於先督府余公。今督府吳公。兩公者。蓋皆有襟帶蒼生之意。俱可其議。復請於中丞汪公。而公固當代之偉人也。調和燥濕。燮理川陵。欲平地以成天。遂安瀾而孟瀆。睠茲碩畫。乃願同心。而先直指吳公。今直指周公。則又倒狂瀾於白簡。標砥柱於中流者。一葦迷津。寸心彼岸。遂相與落其成。而公於是揣基址。略遠邇。稱畚築。商物力。量工命。曰不愆於度。而又選幕中之有強幹者。得若干人。以董其工。所費金錢。俱出節省之餘。不損軍國。閱五年。而橋始成。左右置石欄。爲人衛也。前後置鐵牛。爲水衛也。首尾置坊題其額。爲橋衛也。遡流而上。東西置石壩。爲城衛也。凡公費若干。歲月若干。而懷來遂隱若金湯矣。事竣。擬文以志不朽。而問於予。予曰。猗歟盛哉。此非所稱媯水者乎。昔何以夏病沒。冬病裂。而今熙熙攘攘。肩摩而過也。夫誰示

我以周行乎。則公之明德遠矣。是故登斯橋也。山光疊翠。掩映襲人。夕陽在山。人影在水。柔波上下。牧馬互嘶。胡笳隱堞。萬竈炊村。此則橋之大觀也。又若山雨欲來。悲風怒木。吹沙滿野。流沫浸堤。亦曾不揭不厲而渡焉。又若黃雲薰日。朔雪席地。重冰帶川。飛霰流澌。亦皆且冠且履而游焉。乃至金臺游子。五陵王孫。折柳言旋。班荆道別。或歌薇北去。或祖帳東歸。莫不記別河梁。消魂彼岸。鎖南浦之愁雲。浥渭城之朝雨。則登斯橋也。蓋皆有低徊留戀。而不忍去者焉。陋周官之杠梁。小公孫之輿濟。建無物之慈航。出有情於愛水。吁。公之明德。真遠矣哉。然非宅心極細。用力極敏。出納極周。節制極嚴。誰能臥蒼龍於天末。掛飛虹於日邊。若此之壯且麗哉。或曰。城不百里。即屬北國。古之築城。惟恐不陵。浚池。惟恐不淵。而當此控弦鳴鏑。朝發夕至之區。即濟河沉舟。諒亦禦敵之一策。

也。而奚以橋爲。脫北國匪茹不門庭之寇哉。曰。非是之謂也。古之禦敵者。禦之於疆場之外。不禦之於門庭之內。向使帷幄無老謀。將軍無壯士。彼長江天塹。敵固不能飛渡之耶。今胡公樹韓范之業。播頗牧之威。人皆敵愾。士可折衝。微論敵歸戎索仰我鼻息。正臥馬掛弓之日。即萬一逆我顏行。直折箠使之。無煩寇令矣。而又何城下之虞乎。公諱思伸。號充寰。乙未進士。徽之績溪人也。而受事司餉者。則運副杜公諱齊名。魏之南陽人也。督工者。前經歷魏君三顧。司其事。魯人也。而坊牌堤壩等。則經歷秦君霖。鳩其成。楚之黃安人也。執事操守戚世登。千總李應科。俱懷來人也。二三拮据。相與有濟。始於萬曆四十年壬子。迄於四十五年丁巳。告成。是爲記。

柴溝堡城記

明翰林
編修 歐陽暉

柴溝城重修工既竣。監生徐琰。生員張應元。至都請文紀之。按堡屬宣府西路。萬全右衛。東去左衛四十五里。南去懷安衛五十里。西去西陽河。北去洗馬林。俱四十里。未堡時。虜或入寇。應勦弗及。正統二年。都指揮文弘廣始築城焉。有司請勅置同參將一員。即以弘廣爲之。與萬全右衛參將。頡頏行事。至都指揮張順胡觀復增拓之。勢益弘固。其後有司以令出多門。不便請罷。協同止設守備一員。統官軍一千九百四員名。後卽增餘三千。又設大名通判一員。行府於此。以司左衛等五城堡軍餉。自是軍有定守。民有定業。日就殷富。文教亦興。蓋百餘年於茲矣。然邊塵久靖。守備漸弛。又兼雨水浸損。風沙擁積。城池幾於湮廢。非一官一時所致也。前通判何繼武。呈准修築。事未就而遷官去。居人患之。比歲邊城失戒。虜或入關。此堡城守不完。人無固志。通判袁一貫。深以爲憂。具

跡當道。請就厥事。會堡人致仕知縣馬珩、琰等二十餘人。亦偕至鎮城。以請。維時巡撫都御史王公儀。巡按御史侯公度。志切保釐。僉曰可。而王公實主之。迺選委懷安閑住參將宋贊。總領修邊重務。兼督役。又專委宣府巡捕指揮周堂董其事。本堡守備官張嵩則公同焉。各官效能。烝夫紆力。財無浪費。役無偏冗。期有常而不亂。勢因舊而易集。勸懲考課。咸維其規。人心大同。而無永歎。又以城下多沙。土脈不剛。特於一二里之遠。取土興築。負重登危。民亦勞矣。計經始之日。凡四閱月告成。城周圍八里。高二丈八尺。根厚三丈二尺。墮亦稱是。城門三座。東曰清虜。南曰承恩。西曰宣威。門樓三座。角樓四座。戍樓一十六座。敵臺關鑰。靡不完具。規模修整。氣勢嚴固。人用稱安。無復外患矣。是役也。殫厥心以規畫者。宋督責之勤。教護之善。在在固多所可錄。而張亦與有勞者也。一堡

軍力不足。又借用河南備禦軍二千名。把總指揮張樸尙允紹約束之。孰非勞事。至如本堡把總千戶郝寶。則提調畢力。而監管指揮顧朝等。與夫分管官旗幾百人。久暫有差。罔或慢事者。工方興。而巡按御史金公城暨李公天寵相繼至。皆究意於是。而振揚邊略。撫字軍民。宣暢國典。以師僚考績。則王公固專任之。諸公勞心於上。衆職共事於下。此工既成。保靖之遠圖斯賴矣。太史氏曰。余讀書至易之萃曰。澤上於地。萃君子以除戎器。戒不虞。坎曰。王公設險以守其國。泰曰。城復於隍。勿用師。蓋言治之不可恃。守之不容已也。我國家驅彝立華。撫有萬國。沿邊據險。設九大鎮。精兵戰馬。無慮百萬。謀臣猛將。鼎列星馳。而宣府密邇神京。爲國北門。猶稱巨鎮。百七十年來。氣勢完厚。恩澤翔洽。億萬世無疆之休在是矣。邇者。間雖不靖。要之地廣山深。草木蕃茂。殘虜或蝨孽其間。我

師持重。有征無戰。比及整旅。彼亦鼠伏。伺我休甲。迺復蚊聚。彝性常然。不足爲中國輕重也。然而治安既久。地上之萃盛矣。戎器之除。復隍之戒。設險之守。在今日豈容已乎。夫保靖存乎險。用險存乎人。作人存乎政。立政存乎才。施才存乎忠。表忠存乎節。險者地之勢也。勢得則重。人者國之本也。本聚則強。政者物之紀也。紀張則治。才者功之會也。會逢則成。忠者順之府也。府立則昌。節者業之楨也。楨存則著。具此而後保靖効時之勳可致也。獨不觀此城乎。創立越百年矣。守之者旌旄相繼。日不乏人。而城隍日湮。何也。節墮故也。節墮則忠虧。而萬事弛。是故而才窒。而政蝕。而人不孚。而險日不可恃矣。何取於守也。可慨也。使前此而守者。皆文弘廣張順胡觀其人也。則此城今日固無勞於重修。使後此而守者。皆文弘廣張順胡觀其人也。則今雖勞而將來可永逸也。而孰能保

其然乎。夫民之永逸。由於官之節。則國之永固。本乎臣之忠。卽一城而九邊之政可推也。卽九邊而天下之政可推也。節與忠之不可廢也如此哉。是故節與忠。天下之大防也。而城池之險弗與焉。節與忠之廢。天下之大患也。而彝虜之寇弗與焉。吁可畏也哉。是用表之於石。以戒夫將來之當事者。

重修龍門城記

隆慶四年

下北路
通判

徐之蒙

龍門屬宣府下北路。孤懸一隅。當獨石之衝。而扼宣鎮之要者也。攷唐穆宗時。原名龍門縣。屬盧龍道。旋改屬河東。元隸上都。明洪武三年。徙其民於居庸。而縣遂廢。宣德六年。置龍門衛於廢龍門縣。設兵戍守。正統己巳之變。復爲外據。至景泰初。協理軍務大員葉公盛。昌平侯楊公洪。共圖恢復。爰招集流亡。繕修城郭。而邊境始寧謐矣。歷今百二十年。日漸傾圮。隆慶戊辰春。兩院暨道憲。協

心康保。謂關鑰不可以不嚴。垣墉不可以不固。遂巡歷險隘。視龍門城之將墮。而議加修築。因委守備張鳳崗董其事。鳳崗親率士卒。陟崗攀崖。刈荒伐木。造柴木既具。乃召冶工石工土工金木之工。陶土爲甗。化石作灰。繩木成材。銷鐵鑄錘。有鑿者築者。有負載而運者。有引索而登者。又有盤雲梯攀峻坂。而累累相繼者。羣工並作。其用心也周。其殫力也瘁。其恤百工也戒勿亟。其節財用也合于度。閱三年而告厥成功。高三丈五尺。週匝四里五十六步。門樓雉堞。巍然煥然。道憲復親歷其地。嘉乃不績焉。夫欲固疆圉者。必有山川城郭之足恃。龍門片壤。內而拱翼神京。外而控馭邊境。尤非他邑之可比。其崇山峻嶺。既足守要害而稱險阻。今復城垣鞏固。捍衛可資。不惟此地可永保無虞。即當日葉楊二公之績。亦由斯而益顯也。予因爲之記。俾後之坐享昇平者。其知所自云。

雲州義烈祠碑記

明 葉 盛

皇明以仁義立國。故有國以來。八十餘年。際天極地。莫不臣妾。惟是己巳歲。北胡作逆。犯雲州。遂以失守。城陷之日。城中死義者。駢首接跡。皆不負所事。死於一日之間。嗚呼。可謂烈也已。於是有以見我國家教化涵濡之盛。而胡騎之薄州城。不踰日而奔遁者。亦豈非英聲義氣。陰折其心之所致耶。皇帝嗣天歷服之初。即舉褒卹之典。以風勵四方。未幾收復雲州。一如其故。聖謨神斷。雄偉而深遠矣。景泰改元之二年。余來雲州。三年提督參將周君賢來與同事。經略之暇。詢諸州人。得死義知名者九十人。因相與作而言曰。壯哉若人之得其死也。推其志也。日月同其明。泰華同其高也。高城深池。不足同其固也。甲冑鈇鉞。不足同其威且強也。使當時皆如若人。雲州其有亂亡乎。不有以旌之。則將何以

奉承上意。獎慰忠魂。揭萬世人臣忠義之訓哉。土著軍官都指揮王榮。指揮沙泉劉寧。千戶王宣等。又懇懇爲言。乃相吉地。築室數楹。題曰義烈之祠。中主義烈之神。招魂以祀之。先是賜祭有文者。錄其副而尊閣之。且爲刻祠之碑。九十餘人。有右副使京兆谷春。都指揮僉事齊東孫剛。千戶池信子婦。上黨陳氏焉。陳氏死時。家人出戰。獨與諸幼居。若子二男二女。若姑姪。男女五。皆陳氏手縊死。陳氏最後從容自縊死。蓋其家十人。誓不受辱。長幼一心。皆死其臥榻前。春剛守永寧。赴援來雲州。與胡遇。且戰且行。以衆寡不敵。入城皆縊死。偏裨士卒亦多從之自縊死。春狷直而惠。永寧人至今思之。剛忠勇有材略。爲流輩所推。惟九十餘人氏名。列諸碑陰。此獨書三人者。以三人事。最有聞。而陳氏生氣凜然。其能爲大丈夫之。或不能爲。尤可壯也。祀之日。有迎神送神詩。因並刻之。

其辭曰。神之來兮。谷慘山愁。雲黯黯兮。風悲秋。神之堂兮。新好且潔。清酒既傾兮。肥粢在列。神其伊誰兮。愍女娥皇。南雷兮許張。亦克有聞兮。承業與強。神歸來兮。故鄉神之去兮。白日晏昏。乘瑞鳳兮。駕祥麟。彼林林兮。生人維忠維孝兮。孰無君親。孰非女妻兮。亦維其貞。我爲州兮。祀事伊始。爾州有人兮。孫孫子子。神之去兮。其來尙無已。

張家口創建通橋記

萬曆二十八年庚子

明 胡守讓

張家口爲上谷市口。重門峭壁。據山河之勝。天之所以限華夷也。遠而望之。旌旗斥堠。掩映雲表。儼若圖畫。前後封疆之臣。周防曲備。中外禔福。不亦康乎。嗣後都督西川梁公。實操鎖鑰。深惟社稷之計。沉機密畫。業次第行之。惟是東門有河。水自塞外建瓴而下。涉者病焉。公日夜圖所以博濟者。適茲芻明珠募義

建橋。公慨然捐金爲倡。義民劉宇。擲千金助之。已字世欽。郝時瑁輩復爭之。乃募工。螯橋。縈趾於淵。豎石爲椿。犬牙相銜。魚鱗密次。長二十五丈。廣二丈二尺。高一丈八尺。翼以扶欄。如其長之數。始于萬歷丁酉。越三季訖功。蓋二百年荒煙白露。一旦而長虹偃波。誠爲要害之津梁焉。公迺屬余爲記。淮防一也。防水者。在未風波之前。防虜者。在未侵軼之前。中路而後馳。猶時有銜楹之變。而況涉乎風波。貪餌以稱臣。猶時有虔劉之虞。而况值乎侵軼。是故固坊束流。增卑倍薄。寧獨水也。意之所向。已在大荒絕漠之外矣。陰飈驀作。微霰乍零。胡笳互動。牧馬悲鳴。飛芻輓粟。餐風寢露。顛沛而間關者。適遄其行。或春和景明。亭堠不驚。雲錦布野。斷雁排空。商者歌於塗。農者徧於野。秦楚吳越。僉趨塞下。行李之往來。而不致稽留者。蓋邊人太平之樂也。公之賜宏也。弭將來之患。而不媮

目前之安。圖萬世之固。而不惜一時之費。茲一役也。可以概邊政矣。

重修萬全右衛城記

萬曆三十三年乙巳

明 向高明

萬全右衛。古禹貢冀州之域。周職方幽并二境。金爲柔遠。元爲宣平。高皇帝二十六年。始設衛治。既遷德勝故城。用甃石包甃。於今二百二十年於茲矣。歲久圯甚。罔裨扞衛。兵憲孫公憂之。下其事於郡丞李公。議定。而後以聞總督梅公。巡撫都御史王公。方是時。遊擊劉君三省。適退獨石分守。孫公聞而喜曰。是嘗與我共事赤城。效有成蹟者。乃力懇于上。調補萬全。而以大工屬焉。君至。審時度勢。與守備孫君應武。伐石陶甃。庇材鳩工。殫智竭慮。皇皇不辭怨勞。而郡丞李公。則勞來徵發。致膳具用。經始於萬曆己亥三月。落成於乙巳八月。周一千四百一十四丈。高三丈五尺。門樓四。角樓四。敵臺小樓二十有七。城門二。南曰

迎恩。北曰德勝門之外各翼以甕城。規模雄整。氣勢完固。視曩之卑陋。不啻什倍過之。屹然稱西北巨防矣。衛之父老子弟。莫不懽欣交慶。以爲保障可資。有造於邊土甚鉅。不可無記。而來徵辭于某。某謹按春秋之義。城成必書。方周宣之盛。南仲之于朔方。仲山甫之于齊。詩人歌詠贊美。千載稱嘆。蓋以設險爲衛。守國善經。矧夫地當絕塞。與虜爲隣。尤防守之不容緩者。今天子聖靈威武。四夷稽服。桑麻徧野。煙火萬里。可謂極治無虞。顧廟堂猶惴惴然以外寧不忘內憂。每申誠邊臣。討軍實力。毋以時懈。而諸汎邊要害。悉以時修築。備豫不虞。則申畫郊圻。慎固封守。固司土者之責也。回憶正統以後。北騎闖入。所在騷擾。上至陵京震動。假令其時墉垣足恃。虜進罔攸獲。能深入重地。充斥自恣耶。萬全壤地雖小。實藩屏上谷。爲京師門戶。世未有不嚴門戶。而欲固堂奧者。然則是

城之築。其爲邊人億萬年無疆之福。固永永不磨也。維時主持斯事者。則總督楊公時寧。前撫彭公國光。今撫馬公鳴鑾。協贊則戶部郎中杜公詩。前口北道郭公士吉。今道張公我續。總兵梁公秀。副總兵王公尙忠。而巡按御史崔公邦亮。黃公吉士。湯公兆京。則先後綜覈者也。是用立之貞石。以示來者。

張家口新築來遠堡記

萬歷四十二年甲寅

明 汪道亨

癸丑春。余行邊閱關塞。跋履茲地。環而視之。僅北面危垣半壁。而東邊則一水朝宗。半爲瀟池。半爲坦道。敵可來。我亦可往。其險固與敵共之也。問其垣之何以虛左。則曰。右爲陸地可垣。而任其左之空隙者。以河流漫漶。卽欲垣之不可得也。問其堡何以縮之內地。則曰。敵來市。卽率我吏士商民。裹糧北嚮。而遇合之。蕃漢錯趾。貿易有無。綿蕞野處。市罷各散去。其撫賞亦然。噫。市可恃乎。遂拆

關慢藏乃爾。恐北門鎖鑰。不如是也。余偕文武將吏。上下山原。則有天設之險。而我未之據也。蓋國家封略土宇。守在關塞。今茲左顧右盼。則兩山對峙。直如巨靈轟轟。攘臂其間。上揮太清。善如剖竹。崖奔壑閉。屹爲兩區。崢嶸豁豁。東西相向。長河來束。爲我北門。截函夏于閩闕。鑠天府于尺牖。上谷延袤千三百里。未有若此山之扼要而雄峙者也。夫有險而不守。非計之得也。且戎心叵測。市易狴爭。脫或衷甲如南詔故事。能禁之不闌入乎。鳥舉獸駭。驀入障內。能圍之不闌出乎。此時甲不及環。戈不及荷。烽不及舉。而南牧之馬。已駢闐山谷矣。誠于此築城堡。豎樓櫓。屯將校。表峰燧。嚴走集。譏往來。時啓閉。隱隱若負嵎之虎。豹。則我處有安堵之便。市無燥濕之虞。不此之圖。而退處內地。是以險資敵也。山川之險。險與敵共。垣塹之險。險爲我專。我恃其所專。而奪其所共。此城之不

可以已也。客有難予者曰。今當安瀾覆盂之時。而爲塹山堙谷之計。非所習見。事必不成。即成矣。吾恐作者勞矣。居者未以爲逸也。余應之曰。張仁愿之城受降。范文正之城大順。种世衡之城青澗。負畚鍤于荊榛。爭板築于鋒鏑。彼豈好勞惡逸。獨與人殊。要以險不可失。時不可緩耳。鞭石而城。激水而池。譬若亞旅。疆以之理。垣墉。編棧。籩。恬不爲怪。若待水決而後堤防。噬臍無及矣。客又難余曰。受降之城。制突厥也。大順。青澗之城。遏西寇。規銀夏也。今國家塞垣聯絡。在金湯。區區。釁。烏足爲重輕乎哉。余應之曰。唐都秦。則西河重。宋都汴。則鄜延重。國家都燕。自開平興和不守。而肩背寒矣。所賴屏蔽嚴扃者。僅一宣鎮耳。張家市口。去鎮城六十里而近。假令垣門不健。必致散漫如影不可搏。將如陵京何。邱文莊有言。封植宣鎮。慎固關口。其策不可一日不講。客休矣。未雨桑土。

吾計定矣。於是謀之制閩。謀之直指。合辭以請。請得俞。乃復經之營之。計丈數。揣高卑。度厚薄。測深廣。量事期。物土方。議餼糧。分命監臬裨校諸文武吏士。畫而董之。戍卒取于僻隅。撥補不增募也。力役取于本鎮。忙傭不他擾也。蓮岡崛起。則削之平之。河流灌注。則鑽堅剡勁。劬而實之。區畫有成。乃鳩傭功。于秋七月伊始。至九月而土工畢。又于明年三月始事。至十月而工竟畢。計堡牆東南二面。並西垣。接連舊城。四正曲直。沿長一百四丈四尺。平高三丈。上加女牆五尺。下掘底。壘石爲基。加瓴壁其上。有跨水一隅。倣江南澤國之制。臨河築堤。鑿趾鐫地。甃甃砌石。剡兩崖。嵌三洞。截斷岸以虹橋。繞湖洄以雲雉。內用板閘。啓閉因時。波洶則闢。以殺怒水之蕩突。流淀則闔。以杜小寇之潛窺。環堡四隅。爲戍樓者各一。內爲公署者二。爲營房者三百。爲祠廟者二。爲八角亭者一。爲棹

楔于衢者一。外撫賞廳三楹。觀市廳二所。司稅房二十四楹。其餘閭閻道路。井井秩秩。憑墉而望。匹馬單兵不能匿形影。屯于斯役于斯者。忘其勞且徙。而家室于斯者。忘其向之砂磧而莽蕩也。是役也。計物料銀僅五百八十四兩。糧粟三千四百九十八石。鹽菜銀一千三百二十兩。其費頗省。人不罷勞。公有底績。私無怨讟。似亦說以先民之忘其勞矣。事竣。余往慶落成。諸文武吏士拜而以城之名請。余曰。拂雲之受降。志略也。環慶之大順。志喜也。寬州之青澗。志地也。今茲城成。而皇靈遠蕩。聲教遠敷。數千里歎闕納賚。至此如歸。了不知霜露雪霰之推殘。謂之來遠可乎。即以名城。吾亦竊奉尼父之訓矣。諸吏士復拜而進曰。今一朝擘畫。而貽千百年之安。後之君子。求爲可繼。能無一言以告之。令無忘今日之拮据。余輾然喜曰。余非創也。因力於人。因糧于困。因士于伍。因材木

于舟楫。因險于斷崖崎谷。而聿有是城。使扞陬者。而在在削坦爲險。增庠爲峻。則藩垣式廓。而神京帝寢。深居堂奧。千萬載以之矣。惡用譽葵恤之言爲。雖然。當茲宮府隔闔之日。而城塞封事。則朝上而夕報可。聖天子可謂安不忘危。奠絕千古矣。且是役也。爲政則有按察使杜承式。張經世。胡思仲。董理則有總兵盧居智。稽覈則有同知孫可僕。周天胤。張光祚。通判孔聞定。督工則有副總兵王栲。吳汝珍。參謀謝宏儀。均効勞勩。余亦曷能已于言乎。是爲記而鏤之于石。

鎮虜臺記

今名眺遠

邊郡候望有臺。古也。而今著之令。所以伺變警衆。預爲之防。戰守皆有資焉者也。宣府爲京師北門。而密邇北敵。特甚。歲戊子。實我大中丞劉公源清作鎮之明年春。公乃偕諸寮。登北山以覽形勝。諭衆曰。敵自東西路入。抵鎮皆百餘

里。且諸衛宿有重兵。彼懼躡後。其敢不肆然而長驅也。吾知之矣。惟北距邊一舍許耳。敵茲毀垣而南。頃刻猝至。視二路勢特劇。何距城東西數里。故皆有臺。而柳河之南。扼兩山之隘。顧闕焉。茲非前人之所遺以有待者乎。既乃度地鳩工。諏日庀事。楨幹既具。舂鍤如雲。並手偕作。不日而成。甃以甄石。繚以睥睨。廣若干尺。高益廣若干尺。四面如之。穴其西。爲門而入。左折。穴其北。累石級而登焉。其巔爲樓二層。以楹計者若干。樓之制下方而規其上。簡卒之壯且健者。俾日夕直而守望焉。扁其顏曰鎮朔。又以其贏。築臺於城南演武場之前。以閱士制如鎮朔。稍劣而卑焉。於是鎮城防守之制以備。先是有占地者。過宣曰。亥子丑歲。當有兵患。直北門。亟爲浮屠以厭勝之。否且莫測。丁亥我師再失利。宣人歷數往歲被兵。適茲三祀。以方維驗之。柳河正直鎮城。亥子丑三宮。山勢至此。

爲河所迫抑。若頰若縮。凹然而袴。劄然而空。如人坐密室。而隙風薄寒所中。則立以致疾。術者之言。其或然乎。公之意則惟形勝之據。以扼其要衝。令典之稽。以飭我武事。不惟其術以惑衆也。然臺旣成。敵知我有備。不復循柳河深入。且有所懲以爲防。亦皆作其敵愾之氣。以故是歲北酋領衆六萬騎。自大白陽結陣南下。我師迎敵。破其前鋒。乃獸駭宵遁。明年駐牧北邊。連絡數十里。小抄掠。輒挫衄以去。迄春夏莫敢逞焉。蓋名臺之意。於是爲稱。而天人之有待而相際者。亦不偶然矣。於是邦之耄耆。踵部使者之門而請曰。惟茲北山。我材孳之所取給焉。其麓我數世之體魄藏焉。其原膺臚。我所佃而稼焉。昔我朝出而事事。惴惴焉。未竣而歸。病行亟顧。而恐其及焉者數矣。繼自今我奠于墉。我收我薪。我往于田。築我牆圃。我行而舒。我畢事而徐徐。吾休諸途而于于。公之賜侈矣。

願紀其實。俾後之人。知所自。惟公經紀是役也。取貲於折罰之積。而不於公帑。徵力於戍卒之假。而不於土人。若巡按陳公邦敷。則從吏於始。鎮守太監楊公。鎮朔將軍邵公永。則時督視之。以稽其程繼。至若巡按廖公自顯。則促其成。都督劉公淵。僉憲周公允中。皆與有督覈之勞。惟俗吏未效一日版築。愧辱諸父老之過也。論之曰。爾宣人徼福於無窮。爾暨子孫。感而懷之。而歌頌之無窮。繫爾人之不忘本也。遂書之。畀董役指揮劉輔等。伐石而勒之。

察哈爾省通志卷二十一

戶籍編

藝文

此卷所錄除著作與金石外皆自清代迄民國有關國計民生之文

請於開平興和添駐滿兵奏劄

清孫嘉淦

奏爲沿邊添駐滿兵事。乾隆四年內閣學士雅爾呼達條奏邊口添兵一案。經臣委員查議於山海關設副都統一員。添滿兵六百名。喜峯口添一百名。冷口添一百名。羅文峪添六十名。俱歸山海關副都統管轄。獨石口設副都統一員。添滿兵七百名。張家口添一百四十名。古北口添一百名。俱歸獨石口副都統管轄。八溝設副都統一員。駐防滿兵一千六百名等因。具題經部議覆。准行在案。臣此次巡閱邊關。親行相度。山海關爲邊疆鎖鑰。宜設大員。八溝爲口外要

地宜駐重兵。均應如原議。添設官兵。其喜峯口。冷口。羅文峪。古北口。張家口等處。添兵不多。易於區畫。似亦應如原議辦理。惟獨石口一處。氣候甚寒。不宜五穀。重山石田。無可樵採。故薪米俱貴。山溝之寬。不能一里。加以河流冲刷。不能得建造營房之地。若使強爲區處。而駐兵既多。柴米一貴。耕牧無所。實於生計無益。原議設副都統一員。添兵七百名之處。似應暫行停止。臣查獨石口外。北行三十餘里。即係平原曠野。土地肥腴。再五十餘里。爲紅城子。垣牆猶在。襟山帶河。平疇沃衍。遠勝於獨石口內。再百餘里。爲開平城。即元之上都也。城廣十六里有奇。龍岡秀發。灤水廻環。實屬形勝之區。計開平紅城之間。可耕之田。不下數萬頃。再張家口外。北行七十餘里。爲興和城。西行百餘里。爲新平城。川原甚廣。一望無際。土脈之肥。過於開平。計興和新平之間。可耕之田。亦不下數萬

頃。查有明之初。常遇春逐元兵于漠北。建大寧。開平。興和。三衛。東通遼碣。西控豐勝。爲北邊外屏。後漸棄而不守。尙論者有餘惜焉。今熱河八溝。皆大寧之舊境。現議添兵駐防。其豐川東勝境內。歸化綏遠諸城。均有重兵彈壓。惟開平興和境內。田疇未墾。弁兵未設。東西聲援。似覺間隔。臣詳度形勢所宜。約計田疇所出。大約開平可駐滿兵三千。紅城子可駐滿兵二千。興和城可駐三千。新平城可駐二千。若開墾田土。修葺城垣。而廣爲駐防。沃野千里。控強萬騎。左提右挈。其於邊防。大有裨益。再國家八旗禁旅。生齒日繁。我皇上聖謀邊慮。屢爲旗人籌畫生計。今幸有此閒曠田畝。若令民人墾種。擇其近城之地。平方寬衍者。畫爲公田。其餘皆爲民田。每墾民田二頃者。必令墾公田一頃。民田以爲世業。公田分給旗人。得完租粟。再加之。以月給錢糧。衣食自益寬裕。且山場可牧。平

原可獵弓馬自益嫻習。此實王道自然之富強。旗民永遠之長計也。或疑口外聚集多人。恐於蒙古滋擾。諸城左右。皆各旗王公大人牧馬之廠。今墾爲田。恐旗人有所不便。又或疑天寒霜早。恐其難於收穫。山少林木。恐其艱於柴薪。凡此疑難之處。臣皆徧觀而細訪之。口外之山。綿亘千餘里。名曰大壩。凡壩內之田。皆已招民墾種。現徵錢糧。此諸城之地。逼近大壩。俱係旗人牧場。與蒙古無涉。旗廠之外。乃太僕寺遊牧之地。遊牧之外。乃察哈爾居住之處。察哈爾乃爲內扎薩克地方。彼此隔遠。無由滋擾。八旗牧廠。所佔甚大。多有餘閒。可以並省。又遊牧之地。方數千里。割其一隅。即可充給。至柴薪稍遠。未嘗缺乏。且壩內諸山。多有產煤之所。若招民開採。自可足用。臣於三月十三日。在獨石口。草芽未青。十四日。至紅城子。青草長大一寸。氣候可以春耕。開平城外。隴畝猶存。碾碓

尙在。若非種植。何以有此。興和地氣較暖於開平。其爲可以耕種。必無疑也。臣之愚意。仰懇聖恩。於今年秋間。特簡王公大臣。前往開平興和諸城境內。查閱各旗放青之馬。共有若干。約需牧地若干。將舊日所分牧地。通盤計算。可並者並之。可省者省之。可兌給者兌之。務使牧場之地。與耕種之地。疆界分清。不致混淆。臣於明春。飭地方官。招民墾種。遴員前往。經理區畫。三年之間。田疇可以盡闢。然後漸次修葺城垣。蓋造房屋。通商惠工。五年。百物皆備。然後派撥滿兵。前往駐防。則凡邊之外。皆成樂土。往駐之人。自便安居。天地之氣。與人相通。人烟既聚。則天氣益暖。天氣益暖。則田疇益闢。田疇益闢。則駐防之兵。可以陸續增添。然則其所益於九邊之防維。八旗之生計者。億萬斯年。而未有已也。

馬市圖序

清王 隲

馬市圖一卷。蓋故明萬歷時筆也。載宣府來遠堡貢市。拓中爲城。旁肖紅崖寧靜諸山。俯瞰梁欏。城中有臺翼然。朱衣危坐者二人。青方袍左右侍者十許人。青袍坐別幄者四三人。環城睥睨。甲楯立者可百人。曼胡之纓。短後之服。弓刀森植。意狀閑整。臺下軍吏數曹。長跪白事。規方墀地。百貨全集。車廬馬駝羊旃毳布繪瓶罌之屬。蹋鞠跳丸。意錢蒲博之扶畢具。其外穹廬千帳。隱隱展展。婦女細弱。射生投距之倫。莫可名數。蓋一時之盛也。嗚呼。當嘉靖之季。北部最強。比年深踐宣大間。大入則大利。小入則小利。士救死扶傷不給。戰守益習。於是邊郡蒸然。稍有起色。迨隆嘉改元。俺答內釁。王襄毅因其降息。建和戎之勛。方是時新鄭當國。中外多言不便者。政府獨違衆聽之。蕃部亦厭兵就餌。歷穆神光熹四朝。北邊最號無事。雖然當有明諸公。但知保疆休士之功多。而不知狃

安玩敵之弊大。但知灌漑銷燧之謀遠。而未審坐甲忘戰之患深。傳曰。善作不
必善成。非虛言也。方襄毅之初建市議。曰。朝廷若允俺答封貢。諸邊有數年之
安。可乘時修備。設敵背盟。吾以數年蓄養之財力事戰守。愈於終歲奔命。自救
不暇者。是襄毅亦知款之不可狃。而姑爲權宜。以紓近憂。而就遠計。異時枋國
之臣。苟以燕閒之時。申固不拔之計。簡軍實。飭戎器。厲武守。常以敵之不至。使
我有以待其至。則封疆之事。無弊可也。乃觀有明之政。一切不然。廟廷好以空
名讐遠。至於斗粟尺帛。濡忍而勿能予。疆吏則媮爲苟且。訓練服習之方。怠廢
而無所事。而一二不諳政體之臣。朝夕以減撫賞。核市值爲得計。使信輕失於
遠人。以齎寇怒。中朝殷算。猶倚其富盛。日勤遠略。援遼戡播。禍拏不解。軫門庭
之憂。忘腹心之疾。亦幸而播卜諸人。再世不競。故勉就戎索耳。萬歷四十年。懷

寧汪公道亭來撫宣時。邊事日蹙。已無可爲者。公欲振其積弊。稍稍繕葺城堡。講宿儲備。觀其論闕餉。上執政諸書。至可哀痛。而卒無如盈廷之泄泄也。夫宣府天下之雄鎮。而神京之近蔽。乃數十年間。戎政液解。士不飽半菽。上罔卹而下日離。凌夷至於崇禎末造。流賊以餓羸創殘之餘。躡陽和。陟居庸。重臣世將。連脰就戮。怨軍驕帥。搏顙恐後。向之扞強敵而有餘者。今則摧弱寇而不足。何勇怯殊歟。亦積漸之勢然矣。來遠堡築於萬歷四十一年。圖之成當在其後。計爾時市局將變。圖猶若誇示大國之威重。物力之豐溢者。迨熟覩其設色布指。將使後之人。得其意於毫素之外。豈亦殷憂深戒。託於諷喻者爲之。是未可知也。夫一圖之小。不足置論。余特感於有明疆場之事。不惟繫一方利病。實則天下後世龜鑑也。高四尺。袤五尺。礬絹寫。今存某處。年月日叙。

保安事略

楊桂森

北地緣邊近胡。受異族侵略者二千餘年。茲專就保安一地。于史可稽者。略記其犖犖大者二十八事。上谷直單于左。王應王之東。烏桓之西。兩不隸屬。名曰甌脫。東西連寇。而霍驃騎破左地。從置烏桓並居上谷等五郡。有難樓者九十餘部落。其烏桓校尉及鮮卑校尉。皆居廣寧。今保安也。此保安雜居夷種之始。即保安見擾之始。爲第一事。晉永嘉五年。廣寧歸劉琨。王浚爭之。驅廣寧士女於幽塞。琨不能爭。此第二事。晉永和六年。燕主儁。徙廣寧民于徐無。此第三事。晉太元二十一年。魏主拓拔珪擊燕。廣寧太守劉亢溼死之。徙其部落于平城。此第四事。魏世祖初。王素討休屠郁原。徙千餘家于涿鹿之陽。立平原郡以處之。此第五事。後魏明帝孝昌元年。柔元鎮人杜洛周圍燕州。刺史崔秉棄城走。

此第六事。唐高祖武德七年。懷戎僧高曇晟反。殺縣令。以尼靜宣爲僞后。約高
開道爲兄弟。開道殺曇晟稱燕王。張金樹殺開道。詔以金樹督北燕州。此第七
事。唐高宗宏道元年二月。突厥寇媯州。此第八事。唐玄宗天寶元年。王嗣忠與
奚怒戰于桑乾河。此第九事。唐昭宗咸寧元年十二月。李克用陷新州。李匡威
救新州。戰于段莊。此第十事。後唐天福十四年。契丹寇新州。此第十一事。遼神
冊二年二月。晉新裨將盧文進。殺節度李矩。降于遼。刺史安金存遁。三月。幽州
節度周德威。合戰于新州東。斬首二萬級。此第十二事。後唐清泰二年。契丹寇
新州。此第十三事。後晉天福元年。以新州等十六州。入于契丹。此第十四事。後
晉天福二年。契丹過新州。命節度翟璋。斂錢十萬緡犒軍。此第十五事。後周廣
順元年。契丹北伐。至新之火神淀。漚僧弒契丹述律。逃入南山。諸部攻述軋及

漚僧殺之。此第十六事。宋徽宗大觀元年。遼蕭乙薛擊破涑水賊董龐兒衆于奉聖州。此第十七事。宋宣和四年九月丁丑。奉聖州降于金。十月丙戌。金主次奉聖州。駐軍草灤。完顏迪古破遼五千於鷄鳴山。此第十八事。宋宣和五年四月。遼兵犯奉聖州。金討之。生獲大石。此第十九事。宋嘉定四年九月。元拔德興府。察汗遂克奉聖州。此第二十事。明太祖洪武元年。元擴廓將由保安攻北平。明兵襲太原。擴廓至保安。還軍救太原。此第二十一事。明英宗正統十四年七月。瓦剌入寇。北八城皆陷。八月十五日也。先于土木擁帝北行。十六日也。先見帝于雷家站。時站隸保安。此第二十二事。明武宗正德七年。北部入寇至保安。都指揮朱壽力戰死之。此第二十三事。明世宗嘉靖二十九年。北部寇宣府。過保安。薄鎮城幽塞去。此第二十四事。嘉靖三十二年。北部寇蔚廣。將犯保安。至

谷村。副總兵郭都力戰死之。此第二十五事。嘉靖三十四年。四月辛酉。寇犯保安。參將馬芳擊敗之。此第二十六事。明嘉靖三十八年。北部入寇。懷來保安。遊擊董國忠拒戰死之。此第二十七事。崇禎七年七月戊戌。保安城破。知州閻生斗死之。此第二十八事。計自明末至今。垂一百九十二年。保安之民。不見兵革。豈不休與。

保安考辨

楊桂森

燕策。燕文公爲桓公子。燕文公元年。爲周顯王八年。庚申。燕文侯二十八年。丁亥。蘇秦說燕文侯曰。秦之攻燕也。踰雲中九原。過代上谷。彌地踵道。上谷名始此。註代北狄之別也。史記甘羅傳。趙攻燕。得上谷三十城。秦始皇二十七年。分天下爲三十六郡。上谷郡居第十四。漢上谷郡屬幽州。隸十五縣。治沮陽。而潘

縣居二。下洛居十五。後漢上谷郡隸八縣。潘繼沮陽居二。而涿鹿居七。下洛居八。晉太康中。置廣寧治。下洛以涿鹿潘陽屬之。後魏兼置燕州。北齊于潘縣置懷戎縣。兼置北燕州。長寧永豐二郡。唐武德七年。復置北燕州。貞觀八年。改置媯州。長安二年。徙治居庸關。光啓中。改置新州。後五代入遼。遼置奉聖州。金置德興府。元復名奉聖州。後至元三年。戊寅。州地震。改保安州。按水經注。代城北九十里。有桑乾縣。國策注。代今蔚州也。蔚州北九十里。今西寧縣。又桑乾水東流。祁夷水注之。祁夷水出平舒縣。今靈邱縣。祁夷水即澗水也。代郡東北十五里。爲東代。爲將城。昌平郡。離營縣。在廣昌縣南。代城東五十里。爲倒刺山。上有佳大黃。今保安城西南八十里。倒刺嘴。產大黃。北有石人城。卽今石人窰。在倒刺山北。代城東北九十里。有空候城。疑卽今桃花堡。又下洛城西南九十里。有

協陽關。即今上關下關。又下洛城西南四十里。有潘縣城。即今灰窰堡。潘縣城
 西北三里有歷山。有虞舜廟。有潘泉。潘城南。有笄頭山。又下洛城西二十里。有
 雍洛城。今長曠下洛縣城。魏之燕州。魏之廣寧縣。廣郡治城南二百步。有堯廟。
 今之河神廟。下洛去平城五十里。今深井。下洛城東南四十里有橋山。山下有
 溫泉。今溫泉屯濕水。即桑乾河。會于延水。今洋河。又下洛城東北三十里。有鷄鳴山。
 趙襄子姊代王妻。磨笄於此。于延水南逕。且居縣。今新保安堡。又下洛城東南
 六十里。有涿鹿縣。今大礮山。涿鹿東南六里。有蚩尤城。涿水東北入顯水。今桑乾河。
 涿鹿東北至上谷郡城六十里。上谷城古沮陽縣。今懷來縣。竹書燕人伐趙。圍
 涿鹿。趙武靈王及代人救涿鹿。敗燕師於勺梁。今廣昌東嶺之東。有山名曰濁
 鹿。又鷄鳴山西十里為茹縣。今宣化下花園地。又下洛西北一百三十里有大

寧城。今張家口。大寧城西二十里有小寧城。今萬全縣。通志舊志以保安爲涿鹿。涿水東北入桑乾。今保安南爲桑乾河。涿鹿在桑乾河之南。保安在桑乾河北。明者辨之。

龍門關辯

清黃人明經
林盛

龍門縣西二十里有關。舊志書隆門。其關下有堡。亦書隆門堡。考本縣冊籍。地方傳寫。皆係隆。彼此沿襲。雖關上有龍關天險一碑。邑人反以爲疑。考龍門縣。昉於唐穆宗。迨宋寧時。金置德興府。以龍門縣屬。明宣德六年。置龍門衛於廢龍門縣。置龍門所於廢縣之東莊。昭代初。仍置龍門衛。康熙三十二年。改爲龍門縣。蓋衛縣雖經數更。而龍門之名不更也。夫衛與縣既皆爲龍門。則關亦宜爲龍關。昭昭也。明兵科給諫葉文莊。有西關社學詩。其自註。西關云龍門衛治。

赤城之西。即舊龍門縣。今稱西關。蓋西有龍門關在焉。故云。又有東莊社學詩。其自註。東莊云龍門所治。赤城之東。稱東龍門。又稱李家莊。故曰東莊。夫葉詩明書龍門關。不聞書隆。且東龍門。亦不書東隆門也。夫東不書隆。何獨異於西乎。或曰。然則何以訛爲隆。曰。恐亦不獨爲訛也。蓋宣自鮮卑擾亂。繼以石晉賂割。自是淪沒靡定。以故河山蕭颯。人民凋敝。不隆熟甚焉。易龍爲隆。亦一時取義吉祥耳。猶夫元之陞州爲隆興府。明之置州曰隆慶州。同一吉祥爲義。而詎知承平日久。無復有不吉不祥之虞。又何藉此區區吉祥之字。以溷乃舊稱耶。或又曰。然則地以龍名者何哉。曰。舊誌龍門縣有石壁。其勢如門。徼外諸河水。皆於此趨海。龍門之謂。或由於此。然雲州有龍門川。獨石紅山二水。從峽而出。茲縣東西以其鄰近得名。亦未可知也。况夫山勢蜿蜒。形如龍蟠。昔孫太史世

芳嘗云。宣地龍岡孤嶺。爲京夏外防。則龍之稱雄扶輿。爲何如者。而顧必以區區吉祥隆字。乃足表異茲關乎哉。

龍關邊垣論

林盛

宣之赤城。龍門。萬全。其北以山爲邊。即以邊爲盡者也。然赤城出獨石口。萬全出張家口。龍門東出獨石。而獨石非其邊。西出張家口。而張家口非其邊。則邊外之地。又何與焉。然其縣城邊外。石塘石頂。金家莊。邊外之草垛。二郎城。葛峪。邊外之明嵯。一堵牆。靜邊城。青邊外之馬頭。回回墓。板山。趙川。邊外之馬圈。雙林。白陽。邊外之柳橋。雙塔等處。其居之者。皆本朝旗人。或沿山爲寨。或負阜爲村。所植者黍稷。莠麥。諸種類。皆與龍門同。所養者牛羊鷄犬。諸牲畜。皆與龍門同。且土多黑壤。收穫饒足。歲時伏臘。俗亦醇朴。儼然衛我龍門。則龍關之邊。直

謂達於石頂。石塘。諸地可也。豈必以金家莊。葛峪堡。諸地爲盡哉。然而論邊垣者。尤有說焉。明時龍邊外。有開平衛。東連大寧。西連興和。輔車相依。龍門之安枕。以此。即宣之安枕。以此。明季棄大寧。棄興和。因以棄開平。移衛獨石。而外藩以撤。故龍門之警有加。夫龍門非他。宣之倚爲屏蔽。即京師之倚爲屏蔽也。古稱葛峪爲極衝。長安嶺爲次衝。則石塘。石頂。諸地。又龍門之所倚爲屏蔽者也。夫以屏蔽如此之重。是必開平復。而龍門外之石塘。石頂。諸地。直置都統將軍。如歸化城等制。則其奠安屏蔽者。乃更萬年鞏固矣。昔在嬴秦氏。北擊頭曼。收河南地。渡河以陰山爲塞。因累石爲城。而上谷居然腹內。漢及蕭齊。楊隋。屢爲修繕。然藩籬遼闊。不謂之過不可也。唐以張說築長城。在媯川以北。遺址尙存。龍門之憑藉在焉。然株守此邊。尺寸自縛。將石塘。石頂。諸地。止付之零星諸旗。

人是錯繡形如累棋。人民懸若騎牆。而縮無餘步。不謂之不及。亦不可。且明永樂隆慶時。石塘。石頂。諸地以北。封順寧。和寧。順義。諸王都督等官。蓋以蔡人即吾人之意。而厥後屢警不寧。夫以興平諸衛之防嚴。而屢警不寧。於外則石塘。石頂以北。可輕委之耶。或曰。石塘。石頂。諸地以北。封爲外藩。奉我正朔。凡朝貢聘享。絡繹往來。皆如直省之內。數十年如茲。若兢兢過是杞憂之鯁鯁也。然我昭代南平滇粵等逆。其俘獲人口。安插古北口外。今其反側子皆爲義勇。方且次第設官區畫統領。而彈壓之勢以重。苟龍門以北。設衛建官。使邊外之聲援。彼此呼吸可通。則石塘石頂以北。白爾聲靈赫濯。而不測之威。不更遠人懾服乎。吾故於龍門之邊垣。寧爲過計也。

保安右衛考

清林盛

懷安去保安二百餘里。道里遼廓。又阻隔宣府。乃懷安衛城內。舊有保安右衛者。何哉。說者謂懷安在唐屬新州。契丹易新爲奉聖州。金陞奉聖爲德興府。元仍爲奉聖。至順帝以地震。改奉聖爲保安州。是保安與懷安原爲一州。故保安右衛與懷安衛得並治焉。然此特詳於金元。而明之設衛。實懵懵也。考明初保安州廢。改宣德府曰宣府。分置邊衛。洪武二十三年。置懷安衛。永樂十二年。始置保安衛於廢州。十三年。復置保安州。又置保安右衛。而右衛初治於順聖東城。維時州縣廢。人民鮮少。各衛皆抽內地餘丁實之。而保安右衛則調天策右衛充之。二十年。以懷安與東城鄰近。又徙保安右衛於懷安衛城。其指揮同知僉事。經歷。鎮撫。正副千戶。實授百戶。試百戶。總旗。小旗。令史。典史。司吏。驛吏。數雖減於懷安。制則與懷安等。蓋懷安乃其正衛。而保安右衛則附入焉者。又考

其公署在今縣城北。與懷安各司錢糧。但錢糧無多。溯其屬堡。懷安則左所屯堡四。右所屯堡五。中所屯堡七。前所屯堡八。後所屯堡亦八。合凡三十有二。而保安右衛。只柳河莊。水閘屯。雙屯兒。向陽村。新莊兒。西灣莊。六處。歷百餘年。乃歸並懷安一衛。而保安右衛裁。按此則懷安與保安原爲一州。第就未置衛時而言。若明時設衛原委。先後分合。正自鑿鑿。又不當徒以金元舊隸爲憑也。且夫地之舊隸。又安有定哉。即以懷安論。明之中葉。宣府分五路。嘉靖末。以張家口左衛。右衛。膳房。新河口。分屬上西路。以洗馬林。柴溝堡。西陽河。與懷安屬下西路。今改縣則以洗馬林歸萬全。而左衛歸懷安。後之考者。其疆索互異。亦猶夫保安右衛之廢置云耳。嗟嗟。河山如故。區畫維新。自唐設懷安。以迄今茲。豈獨一保安右衛之廢置乎。他如爲陵爲谷。又卽是可推論也。

重修懷來縣通橋石橋坡記

通濟橋者。京張往來之孔道也。在懷來城東。媯水河。原建十五孔。純以石爲之。連坡四十餘丈。臥若長蛇。真鉅工也。初不知其所自始。說者謂前明用官帑創造。然語出無稽。不可盡信。自乾隆三十五年。被水冲塌。僅餘五孔。道光十六年。前任縣令倪。接修土坡。垂四十年不壞。光緒十九年。何縣令改築石壩。且易其名曰金剛壩。不意工甫告竣。而山水漲發。石壩瓦解。人言嘖嘖。是一憾事。不得已於石橋上流。暫修浮橋。設局抽捐。本爲重修石橋計。乃發商生息。已集制錢萬餘千。而光緒二十六年。聖駕西幸。全數提用。嗣後浮橋屢壞屢修。捐數不敷。虧累甚鉅。宣統二年。馮大令洩斯邑。凡百新政。盡心整頓。循閱此橋。每慨然曰。石橋不修。此五孔亦將傾圮。甚非久遠之計也。三年四月初。商諸典署龐少尉。

集紳開會議。僉云：工大民窮，集貲非易。若此次捐款，不償浮橋以前之債，永免石橋以後之捐，或者踴躍樂輸乎？議遂決。馮大令請諸上憲，招天津工程局估其工，約定石坡十七丈，添橋二孔，馬路二十丈。雖水勢凶猛，既不慮其壅塞，更不患其泥濘。四月十四日開工，不兩月而大工成。河濱舊有河神關帝二廟，亦借此款重爲修補。總計用銀幣一萬一千餘元，是役也。關心路政，首爲提倡者，馮大令也。勸捐督工，朝夕不懈，勞怨不辭，總其成者，龐少尉也。而閣邑紳商，熱心公益，共成善舉，刊之碑陰，數十年而後，盛德大名，均將永垂不朽矣。是爲記。

按此文淺俗無足取，以其有工程可紀，故錄存以備考。

第五師範學校建設記

口北地處邊陲，山高水激，氣勁風寒，生其間者，獨成風氣，勢使然也。夫遠古邈

不可稽。惟自元明迄清。興學茲地。數百年來。漸聞有絃誦之聲。此其民不特崇
尚武術。而文雅之士。亦漸出焉。科舉廢。學校興。口北亦未瞠乎其後。事在人爲。
不能爲地限也。省立學校。設置宣化者。向祇有中學一。而投考學生。往往因額
滿見遺。中途輟業。欲投考他學。必負笈擔簦。奔走數百里外。不獨山川修阻。跋
涉維艱。而地方清苦。寒士居多。每因資絀。欲行不果。是以遊學者寥若晨星。而
各縣小學。常患乏教員之選。識者憂之。所以有議設師範學校之舉也。先是直
省學區。規定五。第一師範。設在天津。第二保定。第三灤縣。第四順德。惟此校成
立晚。故以第五名之。然則設於宣化者。以其爲口北首縣也。地居各縣適中。來
學者道里平均。較他縣爲便也。然縣城寥闊。有彌陀寺者。宣郡之古刹也。地基
高敞。而幅員寬大。形勢之佳。罕有其匹。以代遠年湮。缺修理。多荒廢。久爲宵小

藏身之所。爲除盜藪。破迷信。用舊材。構新舍。取其建築省而成功速也。乃以此地爲校基。自民國四年春。口北各縣勸學所。有改劃師範學區之爭。實爲此校建設發軔之始。事不果行。是年冬。經直隸教育會一再請求。始有設立此校之議。至五年夏季。議定出售大馬羣地。建築費方有所指。六年一月。省長朱任楊君欣蘭爲校長。並遴四人爲籌辦員。甫朞月。而校舍落成。輪焉奐焉。以有今日。然亦苦費經營矣。地在城內之東北隅。四周築圍牆。居中高大。室可容三百人。爲全校學生習禮之地。額曰禮堂。內懸校訓四字曰。忠信敏公。禮堂之前。東西廂房。各三間。爲圖畫室。爲成績品陳列室。南則九間。爲各職員辦公室。中有路通外庭。築八角石欄。鑿池爲養蓮畜魚之所。池之旁有小室。西爲傳達處。東爲應接室。再南則大門通街。禮堂之後。連續建正屋三層。每層七間。除中間一爲

往來路外。左右各三間。爲講室六。禮堂之西。建正室六層。每層十間。爲學生寢室。自習室。理化室五間。在寢室六層中間。而教員寢室亦在其內。爲便於管理也。此後飯廳相連六間。可容三百人。最後爲厨室五間。盥漱室。夫役室。茶爐。廁所。皆在西偏。統計一百三十七間。此皆新築之校舍也。禮堂之東。有小院一。因絀於經費。未遑改作。故仍其舊。手工教室。游藝室。教員預備室。在焉。原有鐘樓一。鐘最大。擊之可聞十里外。校內用此以司眠起。操場亦寬廣。在新築校舍後。舍之東南爲校園。佳卉葱蘢。多桃李。而葡萄六七叢。尤稱特品。傍清河引流灌溉。誠佳境也。全校面積。約佔一十四萬四千四百方尺。而續購迤西之民舍。尙不在內。以後擴充。頗有餘地。來此學者。必以保持清潔。愛護公物。以維全校之名譽。庶不負國家費鉅資。諸君子具苦心。深謀遠慮。造茲廣廈。培養莘莘士子。

鬱爲國家楨幹。此則所厚望焉。

萬全縣疏泉鑿井記

劉秉怡

距城北三里許。得勝關迤西。二郎山之北麓。其地終年沮洳。浸而漬澗。易所謂山下出泉者是也。鄉人士恒以縣城負山襟嶺而居。地勢崇峻。井澠綦艱爲病。近年以來。尤苦水源之缺。民國六年夏。邑人趙君子忠。馬君紫林。倡議開築斯泉。挹注城內。以濟官井之窮。並參觀唐山水機。津門自來水廠。事不果行。七年冬。馬君紫林復倡暗水之議。偕邑人馬君習之。商諸霍君馨南。霍素好義。於公益尤熱心。即允出巨資。試掘之。則注玉跳珠。滃然而仰出焉。闢十數武。得先人暗水瓦筒二三。或謂得勝關在金元爲用武之地。斯乃古戰場汲水之遺蹟。此當另考。然足徵古人之先得我心也。於是鑿山阿。開石罅。決泉源。覆溝洫。輦沙

石。沕。滴。乎。河。洲。洄。洑。乎。壩。上。軋。盤。乎。北。闕。涌。裔。乎。城。關。汨。汨。乎。其。來。既。入。城。順
流。而。南。循。水。道。建。井。九。橫。亘。通。衢。九。年。仲。春。之。月。賡。續。其。事。復。建。東。西。街。井。十
五。工。亦。如。之。易。曰。井。冽。寒。泉。食。其。斯。之。謂。歟。彼。居。民。飲。水。思。源。其。感。戴。又。何。如
也。方。其。建。築。西。街。水。道。也。紆。紆。曲。折。繞。道。縣。立。高。小。學。校。之。西。南。隅。造。井。校。內。
汲。水。甚。便。其。惠。及。全。縣。士。林。有。如。此。者。豈。僅。一。城。受。賜。而。已。哉。南。城。外。退。水。之
處。築。池。一。澣。婦。牧。童。咸。色。然。以。喜。洄。酌。之。利。亦。溥。矣。夏。季。既。望。乃。蒞。事。霍。公。慨
然。代。闔。城。人。民。任。其。全。數。用。款。約。計。共。銀。幣。一。萬。一。千。元。之。譜。馬。君。紫。林。組。織
暗。水。社。募。歲。修。的。款。以。善。其。後。是。役。也。董。其。成。者。爲。馬。君。紫。林。測。量。高。下。督。工
造。井。設。備。一。切。爲。本。縣。西。區。區。官。馬。君。曉。寒。佐。理。者。有。邑。紳。李。君。仲。淵。羅。君。泮
林。邑。人。趙。君。汝。梅。閻。君。樂。軒。馬。君。仲。維。陳。君。寶。如。姚。君。福。如。等。凡。任。事。諸。君。均

屬義務。而弗辭勞瘁。其急公好義。與霍公之樂善好施。宜乎並垂不朽矣。矧憶此工未竟之際。城內官井不數數觀。修綆三十尋以汲。爰冀一掬之盈。不特求過於供。涓滴爲難。抑且一擔之水。需制錢二十文。中人之產。亦恒以爲病。况甕牖繩樞之戶耶。今也沆泉汨出。縱橫城內。非素封之家慷慨。見義之士勇爲。曷克臻此。是不可以不誌。

故交通部技監粵漢川鐵路督辦詹君之碑

海通以來。吾國選派士人。游學東西洋。四十餘年。項背相望。以迄今日。其間興教育。修法律。整軍政。及以一材一藝。效用於國家者。多不可僂指數。求其功績昭著。堅苦卓絕。爲海內外同聲贊美者。蓋未有若詹君者也。君之游美國也。年甫十二。時同治十一年。爲我國派學生出洋之始。至光緒七年畢業始歸。其所

入學校。爲美之威士哈吩小學。努哈吩中學。耶路大學。其充教員。則爲福州船政局。廣東博學館。廣東海圖水陸師學堂。其充工程師。則爲天津津盧。錦州萍醴。新易潮汕各鐵廠。其充總工程師。則爲京張。張綏。川漢。粵漢各鐵路。最後任漢粵川鐵路督辦。而以京張路工爲尤著。京張路者。自京師達張家口。長二百七十餘里。南口以北。岡巒重疊。溪澗紛歧。地險而工艱。出居庸關。則入達嶺橫。蔽於前。其上爲古長城。峭壁百尋。賊心怵目。君初履勘。擬由石佛寺向西北行。當鑿洞六千餘尺。其後乃改由東西斜行。就青龍橋施工。關峽。僅鑿洞三千五百餘尺耳。當是時。君所携習工程學者。僅二人。晝則繭足登山。夜則繪圖計工。無一息之安。既而其二入者。或以專他調。議者竊以爲我國人。未有當斯任者。君益冥心孤往。不以無助而少弛其志。凡十八月而山洞成。四年而全路告

成。開車之日。王公士庶。及東西人士。觀者數萬。咸嘖嘖歎爲前古所未有。時予
方任郵傳部尙書。親覩其盛。實君生平莫大之榮譽也。君之督辦粵漢川漢鐵
路也。國人以所信君於京張者。策工之必成。日多跂望。君已先成湘鄂之武長
一路。及漢宜路之首段。而君遽以民國八年四月二十四日。歿於漢上。年五十
有九。其遺呈三事。語不及私。知與不知。罔不嗟悼。鐵路同人。請於八達嶺立祠
禱像。以志景行。予故舉其瑩瑩大者。著之於碑。以詔邦人。而訊異世。君名天佑。
字眷誠。廣東南海人。所著京張工程紀略及圖各十卷。銘曰。

繫昔輪輿。

冬官所掌。

知者創物。

制器尙象。

泰西新術。

凌越先民。

鼓鑄風火。

千里比鄰。

君以弱齡。

遨游海外。

擷精抉微。

超然神會。

十載學成。

眷言宗邦。

呈材司契。

並世無雙。

神京西北。

逶迤原隰。

飛梁穴山。

雷殷電翁。

君之始事。

中外危疑。

及其成功。

鬼設神施。

衆遠君能。

異喙交譽。

君則撝謙。

蕭然無與。

楚材用晉。

客卿入秦。

惟君觥觥。

吾國有人。

川粵萬里。

經營伊始。

周道四關。

冀昭同軌。

命則有終。

名則不磨。

勒詞貞石。

永鎮山阿。

中華民國八年七月。

南口陣亡將士紀念碑

新時代之創造。自乎無數志士。作順應時代需要之犧牲。故其犧牲愈大。則其創造愈偉。此其效不必見之於其地。其時。而其影響。常及乎九州百世。使九州百世聞之。莫不興起。此其先導力為何如耶。南口之役。在我國革命史中。占極

要之位置。亦犧牲最大之戰役也。辛亥以還。而廢帝之踞故宮。發僞詔也如故。共和國本。凜凜可危。繼以賄選之事成。議士則自墮其人格。竊國則利用其多金。此其害俱足以亡國而有餘。玉祥十餘年來。引爲奇恥。因有十三年國民軍首都革命之舉。自是而後。樹仇敵。招嫉忌。無一日不在被人協謀搆陷之中。我將士以正義之不可奪也。其砥礪自勉亦愈甚。縱橫轉戰。相與扼守於此。自十五年三月至八月。鹿金戰恒澈晝夜。北起多倫。南迄蔚縣。宛轉戰綫蓋千里餘。其環而攻者。則傾十餘省之兵力。衆寡既殊。四境皆敵。我將士馳騁於炎天烈日之下。効命於糧餉械彈交困之時。險阻艱難。毫不措意。雖死傷相望。而氣不稍餒。於是南方革命軍。起粵桂。入湘鄂。長驅北上。得與我軍會於中原。終成十七年底定幽燕之局。而南口戰役。所犧牲剏造者。其效始大著。方我軍之放棄

南口也。國內外習軍事者。謂是役之烈。爲近年所未見。爭論戰跡。絡繹以至。咸以溝壘之堅固。交通之聯絡。種種設施。皆具有以少禦衆之至計。其在戰爭區域內之人民。不感當時饑軍徵調之苦。公業晏安。終始無擾。尤謂紀律之嚴。今古罕覩。嗚呼。榮譽之來。非偶然也。玉祥與諸將士共患難。生死者。多至二十餘年。迨幽燕底定之日。乃登居庸關八達嶺之巔。以弔我三千餘衆之死事同志。涕零心痛。不能自已。舉凡撫卹遺族。褒揚令名。玉祥已竭其心力以圖。我死事同志之姓名。則一一紀之鄭州三民主義烈士祠中。然皆不足以慰我將士而終成未竟之志。以剗造時代者。尤爲玉祥與後死同志之責。應所共勗。惟是役關係之重。而其效又不見之於其地。其時。深懼其久不復傳。更無以對我忠勇之先烈。是以勒石爲文。用彰往蹟。登碑高塚。同此長城。以志吾哀。且勸來者。中

華民國十九年五月馮玉祥記。

重修朝陽壩記

李同卿

涿鹿四山環抱。自太行伏脈。蜿蜒數百里。經蔚羅安塞。直達龍門保寧筆架諸峯。而桑乾河適當其衝。河源發於馬邑金龍池。流入縣境西偏。孤山對峙。水勢陡懸。夏季漲時。波濤汹涌。如萬馬奔騰。浩瀚迅厲。勢若莫禦。河流泥沙併下。前明時開渠注水。田稼以豐。河之北岸。地勢低窪。不幸而橫決。則民田廬舍。縣城渠道。皆可危也。清乾隆間。於朝陽山下。壘石作壩。長一百八十丈。謂之官壩。係上二上三渠與城關通力合辦者。咸同兩朝。屢加修補。又於官壩之東。續修六十六丈。謂之公益壩。係附近村莊合辦者。民國六年。據屬人民呈報。河水漲發。將官壩冲毀一半。公益壩全行冲毀。大溜直入頭二堡等五村。勢將迫近縣城。

此壩未經修補。垂六十年。無力禦防。民間亟以修復此壩爲請。周知事因檄董劉永祥等。相度經畫。僉以河身極高。水流甚猛。非挖四五尺。不能堅固。壩底非多作臥牛。不能護衛。壩身非背後培土。不能靠實。本此原則。久議既定。即以該渠長等。總理其事。而以各界紳董助之。凡新築大壩一百九十七丈七尺五寸。高一丈五尺。寬一丈三尺。一丈五尺不等。頂寬五尺三尺不等。壩之南面。作臥牛六段。背後培土。栽榆柳樹六百餘株。鑿箔渠口三孔。修補舊壩三丈。建河神廟一院。築監工室三間。總計用款銀一萬二千八百元有零。較原估丈尺。多築二十餘丈。較原估用費。尙節省二千餘元。且臥牛渠口。與善後各工。俱在原估之外。又復續修十丈。各項經費。係撥自治存款。宣錢三萬九千吊。撥警察備荒費。宣錢四千九百吊。又商捐宣錢四千五百吊。其餘款項。則按照頭二三渠

之澆地遠近。以爲攤捐之多寡。續修十丈。則近壩左右之地。按畝攤捐。是役經始於民國七年二月。迄於十二月蒞事。經修壩者。劉永祥。張有鵬。經理銀錢者。王兆麟。張尙志。楊植名。警察所長吳正雅。中北區區官武承文。爲副監督。靳泰。劉玉璽。閃撫辰。谷瑞璋。爲幹事。陳友仁。馬洪。爲庶務。董塔。董長齡。爲文牘。壩工告竣。委員勘驗。鑿齊豐厚。純用方石砌築。石灰抹縫。灌漿。巖如磐石。巖如壁立。屏縣城之門戶。扼三渠之要領。山水暴至。激蕩冲刷。槽道深利。沿河之民。旣免泛濫。復得灌溉渠溝。五百餘頃之水田。盡化瘠壤。爲膏腴。當其呈請修壩時。均以水害爲患。豈知轉瞬之間。全河順軌。樂利生民。有如此哉。凡民易與樂成。難與圖始。今幸克底於成。壩南河心。不准欄河淤地。壩之背後。留地三丈。永遠栽樹。修理守備之責。歸之渠長。從此事無不舉矣。周知事如鑄。恂恂儒者。以實心

行實政。任賢使能。成此巨功。若非誠信素孚。曷克臻此。顧壩工且然。卽此壩功。以推之。學警實業諸大端。自是穩固根基。裨益實用。將來民物富庶。政教昌明。必更有卓然可觀者。周君其勉之。吾復爲涿鹿人幸也。

按此文非佳第取
其有工程可考

修漢諾壩記

民國二十三年六月張北縣長阜平

陳繼淹撰立

漢諾壩位於省垣張北間。西北孔道也。車馬行人。日千百計。山經險巖。幾同蜀道之難。入冬尤苦風雪。凍而僵者累累。癸酉秋。余襄辦察北軍事善後。兼署縣令。聞之怒焉。時以歲寒。擬修未果。甲戌春。適主席宋公明軒。巡視張北。卽陳其事。以歷任積存公款。及生金變價。計千五百元。爲修築費。并於壩上建屋。遮避風雪。公曰。斯舉也。先得我心之所同然。經營之謀。遂定。壩之巔。曰風干樓。寒特殊。坡度斜陡。土人告余曰。人畜凍死者。往往於茲。幾經勘查。決計廢之。另於東

麓闢新道。長五里許。寬二丈餘。直達黃花坪。北端有溝深阻。因建橋一座。曰文瑞橋。北數十武。築舍五楹。配以馬廐。繚以短垣。計鳩工庀材。開石敷土。未兩月而告成焉。化險爲夷。一望康莊。行者歌於途矣。爰記其顛末。勒之貞珉。以告來者。與我同志。嗣而葺之。庶此工之不朽也。董其事者。爲張北士紳張瑞。而漢諾壩恒慶店執事寧榮。助力尤多。故並誌之。

萬全縣永豐堡水母宮碑文

蓋聞德者福之基也。善者慶之源也。福多者概由大德而來。慶餘者各本積善而有。久矣夫。亘古迄今。昭昭不爽。茲因萬全城東永豐堡西。舊有溫泉。流傳至今。清水湧出。厥理難名。在冬則溫。既夏則寒。混混洋洋。載清載瀾。遂乃鑿以爲池。樹榆柳而密葉覆雲。重陰蔽日。氣泠泠以含涼。風飄飄而恒飛。于焉志在流

水者而登臨接踵。藉以資生灌田者。乃支流百出。斯固爲永豐堡之勝境。而居民賴以養生者。實浩蕩無窮矣。即如上下堡皮行。亦重有賴焉。羔羊之皮。濯以清泉。雖非若醴泉消疾。聞乎李氏之朝。而清身灌垢。合乎滄浪之詠。吾儕向在池內浴皮。久切仰報之思。實無由而自伸。迺自乾隆四十七年。本泉北建修水母行宮。復設住持。誠盛舉也。奈養育無多。因而募化。上下堡皮行。凡有素在池洗皮者。各量己力。公出資財。共湊銀九十餘兩。以作本廟香火之資。藉伸連年經營之意。公同張家口上下堡。併永豐堡鄉保。議明勒石刻銘。以作永遠不朽

之誌云爾。

別載金石篇

張世威 王全 許成功

經理人 趙國琮 趙之安 任全 公立

郎秉公 孟誠 王德龍

乾隆四十九年歲次甲辰孟夏穀旦

蔚州楊氏先塋碑銘

集賢侍講學士中奉大夫趙孟頫爲文並書篆。

中順大夫晉寧路治中楊侯既葬其曾祖以下三世于蔚州將立石墓左而蔚故不產佳石有告之者曰永寧口有石天成如龜趺高三尺廣四尺其長倍高侯輦致之夜有大聲三若自龜出者又有告之者曰去石龜三里許有石如碑高廣與龜稱復輦致之及門霾霧昏塞碑作大聲躍于地前行三十有二尺侯求余文將刻諸石爲余言如此余蓋疑之已而得蔚父老之言於宣德府者爲之歎曰鬼神之相之也其有以哉於是復徵其行事得參知政事玉公思廉所

撰侯爲平定知州時德政碑言賣口

原碑此字漫漶

本均課程收皮革興碾磑省民錢

五萬餘緡他善政甚多又得榆關岳蕃及同知武州事楊述所爲碑文言侯引龍池以給安平溝郟湫以通亂柳導盤纏河以貫裴村凡水之利無遺力焉而侯不憚胼手胝足躬事畚鍤以爲民倡故雖功大力鉅而成不踰時古所傳西門豹鄭國之流殆無以過之蓋侯性朴質強力絕人有可以利民者爲之不啻若嗜欲使侯得居大官則其所建豈止於是哉宜鬼神報之以龜石云侯名贊蔚州人年十二給事馬驛馬肥好十六歲祖母代之還家爲農稍長右三部俾領三千人採木作大都城門時至元四年也俄佩銀符見世祖皇帝于廣寒殿授蔚州採木同提舉十六年佩金符凡四爲採木提舉由奉訓大夫改奉直大夫秦安州萊蕪等處鐵冶提舉尋知嵐州平定州皇太后幸五臺以侯爲中順

大夫知宣德府仍領採木之役特賜鈔二千五百貫貂裘一至大二年除晉寧路治中今年七十六矣上下馬如少年真奇士哉曾祖諱德清儒而不仕祖諱方從太師國王爲副元帥佩銀符父諱伯榮亦不仕葬以口口

原碑此二字缺

墓在蔚

州麥子疇銘曰至頑者石冥然無知無喙而鳴無脛而馳茫茫之中有物使之信哉楊侯言不吾欺興事利民甚於渴饑孰謂鬼神能報厥施彼牧民者鮮克是思剝下爲利徼幸已私天則不祐雖盛必隳於維楊侯先壟在茲若祖若考英靈攸綏有龜自至負是豐碑千有百年視此刻詩

別載金石第五圖

至治元年十一月二十七日立石

勅賜顯化禪寺之碑

資德大夫正治上卿禮部尙書前子賓客國子祭酒毘陵胡濙撰文

嘉議大夫巡撫大同宣府都察院右副都御史五羊羅亨信書丹篆額

宣德五年春正月宣宗皇帝以永寧爲口外要地特勅內官谷春同大監祁三保都指揮韓鎮指揮張華陳震領在京神機等營官軍往彼鎮守初駐獨山後緣無城垣保障具奏本年六月欽蒙遣總兵官陽武侯薛祿等統領官軍至地名灰嶺築立土城被雨水傾損復以石包修完固仍於城內建寺一所都督沈清施絹繪佛像五尊宣德六年都指揮朱謙塑釋迦文殊普賢伽藍等像送寺供奉正統元年寺宇欹傾谷春素稱佛弟子法名福響亮發心施財及募衆緣重新修蓋殿宇廊廡伽藍方丈祖師禪堂山門寮舍庫庖漏煥然一新裝塑佛像及阿羅漢靡不完美延僧湛榮爲主持正統八年九月總兵官永寧伯譚廣施經一藏衆僧閱誦至次年正月誦畢回向適欽差中官阮葵齋勅到營協

同守備復令僧衆建孟蘭盆大齋三晝夜且茲寺靈應凡迎接佛像脩設大齋
俱現五色祥光人咸共覩春等踴躍懽忻具事狀謁予徵記予惟永寧乃口外
要衝之地中貴谷春篤好佛乘建此梵刹雄鎮邊陲上祝皇圖鞏固下爲生靈
祈福榮公主持嚴重簡默誠心慕道晨夕焚脩接納雲水香花燈燭之供日用
飲食之需皆仰給於谷公是皆宜書垂示來世俾後之登于主席及處于其內
者知剏始之由是迺是續相與保守於無窮可也

別載金石第十二圖

正統十年歲次乙丑丑月吉日立石

瑞陽李紹鐫

勅賜昭化寺碑

嘉議大夫巡撫大同宣府都察院右副都御史五羊羅亨信撰

嘉議大夫總督宣府等處邊儲戶部右侍郎東吳劉璉書并篆

懷安衛東二十里昔置懷安縣隸興和路元運既終普天率土咸歸于我職方以縣地臨胡虜盡徙其民入居腹裏空城阨險而不利於戰守洪武壬申乃相西郊高明夷曠築城宿兵以鎮焉衛則因縣之舊也城西隅初創永慶禪寺爲祝禧道場規模宏豁神人具瞻歲久風雨飄零日就凋敝于時邊鎮政殷脩葺有不暇及竟致傾圯遺基雖存鞠爲茂草見者莫不興歎永樂甲辰秋仁宗昭皇帝嗣大歷服更新治化選將總師控制西北復簡中官才識超邁者統領神機分防邊衛以時操習鎮禦塞垣於是奉柏公玉武公住相繼來禦懷安衛衛所控東自新河口西至西陽河延袤幾三百里俱瀕北塞實爲要衝二口口相往守二十年于茲仰賴列聖之威靈口口口口口口不興士卒安於耕牧未嘗有所亾失若有神爲之默相者日夕思惟酬答無由祝延靡所忽形夢寐有

人對曰明府欲報四恩惟脩古刹獲福無量覺而訪之耆舊曰城西舊有廢寺時現神光夢之所感其惟是邪乃齋沐躬謁拜許鼎新舊建塑裝諸佛上祝皇圖永固下保邊境清寧先捨已貲爲倡官僚士庶聞而翕然樂從咸曰斯寺之廢已久一日幸遇明公舉脩殆非偶然於是富者助財貧者捨力謀猷相度僦工庀材諏日興作治其繁蕪拓其規製中立大雄寶殿次列天王殿前闢山門東居觀音羅漢西奉地藏十王後建三大士殿伽藍護法各有位次藏經有殿僧房丈室庖廩庫供具器物種種咸備脩廊廣廈棟宇翬飛曲檻雕闌棖題藻麗像設尊嚴金碧炳煥誠足以覺羣迷而化善類矣經始於正統改元丙辰二月落成於癸亥春二月二公之用心可謂勤且勞矣乃具本未疏聞於朝特奉玉音賜額曰昭化寺命儀曹授僧人印穩爲住持俾率其徒披誦眞詮以祈

景旣復念斯寺之建非一日而成苟無文以紀其績將何以示後人因奉狀徵予言勒諸貞石以垂不朽嗚呼粵自如來滅度像教東傳迄今千三百八十餘載矣凡有國家者咸知尊奉以裨政化然叢林大刹宏豁壯麗則又莫過於今日其據而擅形勝者殆周於天下何其盛哉二公來禦是邦同寅協恭撫綏士卒政教興行兵民咸遂不惟克舉其職尤能集福以利於人其志誠可嘉矣後之嗣守於斯者尙思前人剏建之勤相與維持而無或弛則香火綿綿而不替福澤彌遠而彌隆是寺歷百世而愈昌矣繫以銘曰佛法東傳肇於後漢歷代咸尊華夷靡間塞北藩鎮曰惟懷安昔建梵刹化導愚頑歲久圯傾崇基儼若鬼神護持有待興作中官出鎮瞻拜心驚自任其責鼎新建營首捐已貲復化衆力焦思勞心不懈朝夕八載工成厥惟艱哉諸天像設堂殿周西伐鼓考鐘

曉參暮禮緇衲雲從金仙戾止降福簡簡密裨化機兵無戰伐民樂熙熙

別載金石

第十
七圖

虛閑大禪師道行誌

古燕幽隱浩然居士孟祥撰

住持大都海雲禪寺傳法嗣祖默齋至書

臨濟大機忽繩墨奚搆將非曠達恢宗之士其孰能振斯綱乎師諱智顏號虛閑龍瑤里人孫姓生而慕善髫年禮普會長老亨公爲師公戲曰出家胡爲對曰生死事大公器之冠歲受具而徧聆講肆輒因世亂隱武安懸崖洞中習定洞隣鬻堂聞誦書聲有省作偈曰聲色元來不礙人或高或下甚分明有人借問其中意石女朝吹火裏笙師嘗味楞嚴經久之入楞嚴三昧復思如來藏教

歷傳中夏略不披閑得非背負佛恩乎尋入汴京寓大相國寺寶梵院星霜六紀兩飜具章聖朝撫定飛錫北來聆廓樂公爲當世冠徑親諸僅五秋乃蒙印可而遜迹巖林曷夤緣之見逼應靈山命出世開堂住持未幾晉嶠案寮專疏邀師居寶林寶林古基地旣尸焉而翦荆拾礫撥土重修垂十年間殿堂廚庫一新建立師嘗之朝河川至搖羅河見香花前迎問其故對曰昨晚山神報有肉身大士將屆我曹故來遠迓師曰貧道修行無力彼鬼神覷破檀那從此鄭重京西潭柘聞師道風命邊幅之方四三年退居舊隱自樂真矣居日謂聞人曰世緣非久奚酷戀乎遂示微疾吉祥而逝即中統四年三月十二日也閱世七十僧臘五十度門資四十餘俗徒莫紀靈骨塔於潭柘寶林惜夫師之去世二十餘年徒門雖夥而慎終追遠者唯提點僧本敬愍先師之示滅思覲奉以

無期繇是命工構祖師廟繪達摩百丈虛聞師真兼置威光堂公既告成新余
爲記余揣立祠樹像之意非矜己能而沾時流之譽不期然乎千古鏡諸而已

矣

別載金石
第十一圖

至元丙戌三月十七日提點比丘本敬立石

法孫性妙同立

析津秦德進刊

縉山書院碑記

上元梅曾亮

永甯胡太守彝軒余同年友也道光辛卯間致仕家居慨然有振興文教之志
乃立義塾俾寒家子咸肄業焉蕭山湯敦甫相國爲記其事踰數年復恢而擴
之因大府入奏改爲書院事將上而君卒其子鏞繼厥志卒成斯舉且復求余
文以記之余惟學校之事所以養人才厚風俗也古者家有塾黨有庠州有序

國有學自世子及庶人之子皆入其中要其所以教者孝弟篤信爲之根柢詩書禮樂爲之範圍誠意正心修身爲之明體而達用而又師友以析疑難勸懲以戒惰媮泊乎成材蒼萃薰陶益多三代風化之原實基於此自叔世學校漸廢教澤就涇州郡雖置立學官而與博士弟子員往往終歲不一接見有志復古之士用是俯仰嘆息相與擇勝地構精舍爲羣居講習之所而書院之制以興炎宋以後若白鹿洞若嶽麓若嵩陽睢陽其尤著者當是時名儒輩出類能修明大道闡發微言而使虛無寂滅隱怪荒唐之學咸滌蕩焉以歸於正則書院亦先王之教所賴以常存其有補於世道人心者匪淺鮮也今我朝二百年來沐浴涵濡文教不著固皆聖天子作人之化亦任其事者有實心也余聞往者彝軒太守官黔中以其地近蠻夷爲建松高書院以化悍俗若與漢文翁之

治蜀者相媲美焉今居其鄉復能以是砥礪士行獎掖後進則永甯去畿輔尤
近吾知都人士優游漸漬朝夕觀摩挹靈秀於山川資賢哲以陶鑄行見根柢
既厚範圍不踰明體達用之學燦然而大備於以出其所抱上佐國家承平之
治下爲閭里觀感之型又安有風俗之不淳人才之不古若也哉余既知太守
能以文教自任且嘉其哲嗣能承父志特書所見以爲來者告焉至其創立工
程本末則蕭山相國所記甚詳故不具

別載金石第十三圖

賜進士出身戶部郎中上元梅曾亮撰文

賜進士出身都察院左副都御史寶坻李菡書丹

大清道光二十六年歲次丙午孟秋月穀旦立

著作

大學管窺。清魏象樞著。象樞字環溪。蔚州人。順治丙戌進士。歷官至刑部尙書。卒諡敏果。平生立朝端勁。爲人望所歸。其講學純正篤實。尤邃於理學。是編爲公歸養時所著。已佚。慶志以爲寒松堂集中。有致知格物解。又有自序。似即其書。或當時僅成是編。或後來所刪存者。皆未可知云云。證以集中答朱小晉同年書。稱自著者有大學管窺等書。皆理學也。編摩數載。概未成帙之句。其說近是。

願學堂講書。魏象樞著。當公歸養時。州守鄭公。雅有移俗之志。於明倫堂西。捐俸建講堂一所。曰願學堂。請公主席。與郡紳士月一會講。明敦倫盡性之學。自四書五經始。每講畢錄而存之。曰願學堂講書。寒松堂集載。四書十一章。透關貫通。不啻示學者以希聖希賢之道。惜僅存其一部。而全豹則久不得而見矣。

韻學真旨。清李予望著。予望字岵瞻。號怡邨。蔚縣人。康熙辛卯舉人。博雅篤學。爲文卓然成一家。

戰功私錄一卷。明馬芳著。芳字德馨。蔚縣人。幼爲北寇所掠。羈虜穴十一年。乘間歸於嘉隆間。以偏裨累遷至大帥。鎮守宣大。親歷百餘戰。身被數十創。以少擊衆。未嘗不大捷。威鎮邊陲。爲一時將帥冠。是編乃其自錄。以訓戒子孫者。計三十六款。實存三十四款。茲搜得抄本。古色盎然。侵蝕殊甚。爰抄一本。存教育館。以資保存。

文廟賢儒功德錄三卷。清張僕著。僕字萬長。蔚縣人。康熙二十五年歲貢。是錄前二卷。輯至聖以至歷代賢儒事略。簡而賅。各繫以前賢贊語。後一卷。記文廟典祀。覈以詳。慶志以原本無存。或云文廟木榜書賢儒事實。猶其所輯者。俟考。

云云。茲搜得原本對照木榜。事實贊語。即是錄所載者。

雲中死事五人傳。清李暉吉著。暉吉字貞生。康熙丙寅拔貢。明末闖賊自西來。守臣屈而降者比比也。何論士庶。雲郡陷。永慶郡王某。管理襄垣府事朱俊。巡按大同府衛景瑗。大同監司朱家仕。諸生李若葵均死焉。忠烈可風。因作傳以揚之。傳載范彪西著續垂棘編。

雲中節義錄。清李暄亨著。暄亨字澄園。康熙甲戌進士。是錄久佚。盡載於垂棘編。

魏實齋刺史西川實政紀要一卷。清沈銳喻中訥張立愛合著。實齋名煜。敏果公六世孫。嘉慶時召求賢良後裔。有司採鄉評以聞。賜舉人分發四川。歷知州縣事十四任。所至有廉幹聲。尤長折獄。是書載其宦績甚詳。沈等籍貫莫詳。爲

實齋幕友。追隨二十餘年。其所紀皆其所目覩者也。道光甲辰年書成。乙巳來鹿堂梓行。

兩鎮三關志。明尹耕著。耕字子莘。嘉靖壬辰進士。官至河間知府。是書言宣大兩鎮。居庸紫荆倒馬三關之事甚悉。志家多採據之。乾隆初輯縣志時。卽僅存半部。在李向臬家。惜乎今已久佚。

國學禮樂錄二十卷。清李周望著。周望字渭湄。號南屏。蔚縣人。康熙丁丑進士。歷官至禮部尙書。當司國子祭酒時。念國學以禮樂爲先務。爰集歷代所用禮制樂舞。成爲是錄。俾諸生窮義理。核名實。以爲陶養涵育之資。昆明謝司業履忠叙云。明先師之統系。揚御製之褒崇。綱領昭然矣。序世家列傳。所以濬禮樂之源。詳祀典。述經志。繪圖譜。陳儀注。所以備禮樂之事。附以石鼓音訓。見三代

之軌物。而岐陽之狩亦禮也。綴以題名碑記。則皆奉行禮樂之人也。云。觀此可以知是書之梗概矣。

壺川擬史。清王家啓著。家啓號誠菴。順治辛卯舉人。出仕新會知縣。書帙志補稱是書持論嚴正。多前人所未發。選載湯誓稱王論一篇。

觀心約一卷。明鄒森著。森字漸齋。蔚州人。嘉靖辛卯舉人。未仕而卒。入祀鄉賢。是書分象數禮樂鬼神曆時陰陽五行太陰太陽天樞地理物理十二篇。蓋理學也。魏環溪序云。諸篇中究天人之奧竅。窺地理之精微。昭人事之觀察。而配合之。辨說元邈。義理悠長。有幹旋兩儀。鼓舞萬象之意。吳廷華撰志補稱是書廣大悉備。入之性理書。其爲同異亦微。特附州乘傳之。俾海內人士。知北方之學。不以橫渠止云。賢者推崇。已可概見。版存縣之宋家莊鄒氏。

儒宗錄。魏象樞著。已佚。寒松老人年譜載。康熙乙未。余居間署。退食多暇。且性寡交。閉門讀書而外。一無所事。從前頗嗜詞華風雅之書。自是惟求躬行實踐之學。遂博探理學格言等書。日夜研窮。至廢寢食。取有明諸儒。分爲四類。曰大儒。醇儒。名儒。通儒。擇其語錄之切實醒透者。手自論定。曰儒宗錄。集載。答申臆盟書。稱儒言錄。亦即此書。

知言錄。魏象樞著。已佚。年譜載。癸卯。余家居養母。菽水承歡之餘。不但無聲色之好。即琴棋詩酒。亦不與焉。惟理學諸書。則嗜慕不忍釋手。有一嘉言懿行。則手自抄錄。心焉識之。卽反而自思曰。能躬行否。知一字行一字。知一句行一句。余之願也。積久成書。曰知言錄。自有明以至本朝。大抵皆切近入理。可以正人心而挽風化者。州志案云。公又有古今嘉言錄十卷。作於歸養時。當卽知言錄。

也。

日知錄。魏象樞著。已佚。集載與申晷盟書。言所著者。有日知錄。成而未梓。力行錄。魏象樞著。已佚。集載答朱小晉書。稱自著者。有力行錄。理學也。

擇執錄十二卷。王家啓編。誠菴致仕後。閉門讀書。專力於明善誠身之學。輯古人嘉言懿行。分三十四類。錄而刊之。取擇善固執之義以命名。用以自省。且範世焉。惟書末列有禍福果報二類。似非儒家言。殆所謂大醇而小疵者歟。乾隆乙丑。縣尉顧冠儒。以原版殘缺。捐俸補刊。嗣後版亡而書亦不得而見。民國辛未。邑人韓善治。偶於雜販攤中購得之。喜不自勝。擬贈教育館以資保存。大儒集萃錄。清李旭升著。旭升號晴崖。康熙壬戌進士。歷官至吏部侍郎。加尙書銜致仕。書佚。

鄉約一卷。尹耕著。耕字子莘。蔚縣人。罷官歸里時。虜患孔熾。民不安居。約鄉人共爲守禦。爰有是作。內分堡置。堡勢。堡制。堡衛。堡器。堡蠹。堡衆。堡教。堡習。堡符。堡費。堡候。共十二篇。籌畫井井。切近事情。不第爲當時自衛良規。後世師其意而行之。崔苻小醜。亦不足爲患也。

塞語一卷。尹耕著。是編分虜情。形勢。城塞。上乘塞。下出塞。抽丁。官軍。戶保。馬練。習。民堡。審機。十二篇。對於攘夷防患。古今之情。戰守之道。編練之方。禍福倚伏之機。言之歷歷如數家珍。文章經濟。並堪不朽。方之六韜三略。何多讓焉。原書久佚。光緒壬午。前賢劉宰庭。併鄉約偶得之。倡議重刊。乃復公於世。

墨辨注四篇。附刑名二篇。晉魯勝著。勝字叔時。代郡人。官佐著作郎。後遷建康令。曾著正天論。表上朝廷不報。是編已佚。有自序錄後。慶志有墨注。原編不可

見玩其序意在正名與所輯刑名指歸一也故列之法家云今仍之

靜巖易說一卷清徐爾壽著爾壽字靜巖咸豐時歲貢書佚慶志載有案語云是書發明河洛之數推衍陳邵之說易外別傳也鈔本有二一題靜巖易說有州人劉敏政序一題易源一勺有州人劉熹序熹本不全敏政本則圖說皆備今仍其名錄之爾壽夙講堪輿故於易主圖說篇中論著亦頗具心得惟後有天報月窟諸解殊腐而鑿又間引及時文亦非著書體例當並刪也云

臥遊錄清李肇甲著肇甲字桂萼號菊逸康熙丙辰恩貢南陽宗少文好山水歷遊名山後有疾歎曰名山恐難再覩唯澄懷觀道臥以遊之凡所遊歷圖之於室謂人曰撫琴動操欲令衆山皆響魏一齋撰肇甲行狀稱晚年雅好山水遠遊江浙歷中州豫章秦川山右車轍所至遇名山大川之勝靡不登覽焉其

志趣頗近少文。是編之名。殆取少文之意乎。惟以錄名篇。當係遊記雜錄之類。慶志以書佚。惟列目於藝術類。未知所據。但原本不得見。今姑仍類於此。以俟考。

九宮私記。尹耕著。書佚。慶志注云。朔野山人集。存論衛青一條。府志存長城及襄山二條。

朔野山人集六卷。尹耕著。子莘罷官後鄉居。號朔野山人。是集爲州守來臨所刻原本。數年前。曾有見者。茲則未訪得。沈德潛明詩別裁。言尹子莘七言律。本李崆峒派。有秋笳曉角之聲。秋興春懷諸詠。得少陵諸將真意。朱彝尊明詩綜。亦以學李而得其風骨者。前有凌溪。後有朔野云。

塞松堂全集十三卷。魏象樞著。是集分奏疏四卷。詩三卷。書簡尺牘二卷。雜文

三卷。年譜一卷。集中講學純正。務求實踐。論事明切。不尚詞華。嘉慶時。有言官奏事。當如魏象樞之旨。自是寒松堂集。益重海內。四庫全書總目提要載。寒松堂集九十二卷。國朝魏象樞撰。又云。其子學誠編此集時。意在於先人手澤。一字無遺。細大不捐。幾盈百卷。未免有榛楛勿翦之憾云云。按是集原版。係公之長公學誠所編刊。毀於火。現行者。爲嘉慶辛未公之六世孫名煜者所重刊。其卷帙前後懸殊。當係重行編訂。非復舊觀矣。版存於治城魏氏家祠。

公餘草一卷。附西遊草一卷。清李振藻著。振藻字約齋。蔚縣人。康熙時。以選貢歷官至刑部郎中。擢貴州知府。以裁缺歸。不復仕。少從敏果公遊。故學有根柢。公餘草。係供職刑部公退時所吟詠。見金德嘉序中。陳廷敬誌其墓。稱晚年胸襟益豪。嘗過龍門。觀太華。適吳越。芒屨竹杖。有灑然出塵之思。西遊草。或爾時

之作乎。書佚。不可考。

一齋新舊詩二卷。清魏學誠著。學誠象樞子。號一齋。康熙壬戌進士。歷典貴州試。校禮闈。督江南學政。丁內艱歸。遂不復出。承父敏果公教。文行純粹。潘來序其舊詩云。讀一齋詩數百篇。皆家園所作。清雋高雅。格律在韋柳歐梅之間。而詞旨冲淡。意趣蕭閒。置身千仞之上。俯視塵世。無一物得而干之。則夫居官之如秋月寒潭。一清徹底。固其宜矣。書佚。

敦古堂文集三卷。清李舜臣著。舜臣字向臬。雍乾中。以文學盛稱於時。而數阨於世。遂絕意進取。益肆力於古文辭。是編乃其所著擬古雜文。金志章序稱。向臬自衷所治雜文若干首。都爲二卷。題曰擬古。余受而讀之。比事不羈。屬辭獨出。傳音振逸。鳴節響籟。蓋先生惟不名一家之長。而衆長畢會云。茲探得稿本。

名擬古雜文。有金序。稱二卷。復探得刊本。簽名敦古堂文集。今從之。實係三卷。蓋加入續作也。

敦古堂詩集二卷。李舜臣著。茲探得鈔本。敦古堂詩集下卷一卷。得心堂詩集卷四一卷。諸首對照。初名得心堂詩集。後經整理分類。選入敦古堂詩集內。賈華平序。得心堂詩集稱。其爲詩。時而沉雄。時而深厚。時而奇詭綺麗。千態萬狀。不可方物云。

宮巖詩集四卷。清李予望著。予望字怡堂。康熙辛卯舉人。慶志有夏敬渠序。稱其集中無一肆志之作。又無一失守之辭。無肆志者和。無失守者介。先生之詩。深得和且介之旨。全書共三百四十七首。今存。

汲古堂文集。清閻介年著。介年字葆和。雍正癸丑進士。乾隆時。舉博學鴻詞科。

輦轂公卿。羣推爲北方學者。歷官至蘭州知府。書佚。府志存魏敏果公事略一篇。現存石刻壺流河堤記一篇。

九宮山人詩鈔四卷。閻介年著。師家相序云。今讀山人詩。如北征河渠五涼寧夏諸篇。舉河湟千里。凡山川雲物。風俗教化。與夫古今沿革。攻守異宜之故。咸歷歷楮墨間。雅而不浮。婉而多致。與風人溫柔之旨。隱相合云。慶志以是刻分七集。其宮巖草三。晉草隴右草爲一卷。金城草一卷。酒泉草青門草一卷。歸來草一卷。師序所論。獨金城草也。書佚。

澗園初草續草十四卷。清李溥著。溥字碧泉。知府厚望子。少補弟子員。慶志載邱仰文序。稱碧泉嘗隨父遊齊魯燕趙秦楚巴蜀間。風土之殊。人情之變。山川雲樹之秀麗。槎枒。歷代英賢古蹟之斷塹頽垣。皆以發其俊逸奔放之才。恣其

憑弔而長其蓄積。故一形之於詩。第爲滌園草若干卷。其懌愉憂喜。大旨曲暢。乎君臣父子夫婦昆弟朋友之倫。藹然自性。而因物寄興。比事流連。率無愁苦之音。備極和平樂易之美。其諷諭所及。則時有含而不露。婉而不迫者云。書佚。又家譜載。已刻者。有香雪小草。並佚。

香厓詩集一卷。清張湘芷著。湘芷號香厓。蔚縣人。乾隆庚午副貢。書佚。慶志載閻介年序有云。予不知詩。見近世漁洋山人之論詩。深契嚴滄浪禪喻之旨。今以按香厓之詩。固不盡脫落言詮。而要皆自寫其得意。非苟作者。至諸小詩。則已得滄浪之三昧。駸駸乎登王裴之堂矣。香厓子炳吉。有詩一卷。亦佚。

虎雲堂全集十卷。清賈樞陰著。樞陰字緒光。蔚縣人。乾隆辛酉拔貢。少有神童之目。書佚。慶志注云。此集爲邑人孫明經所藏。以半部寄閱。據原鈔目錄十二

卷前六卷爲詩文。第七八卷爲時藝。九卷爲鴛湖雜錄。十卷爲詩話。十一卷爲秋窗筆話。末卷爲京華夢游錄。樞蔭才名噪一時。落拓不偶。每以唐六如自况。文亦略似。以未見其雜著各書。故與詩文並甄錄爲十卷。仍附其目。至應試之文。當別爲一集。編次不宜躡入云。

贈言集一卷。魏象樞編。敏果公歸省歸養。兩次出都。當時名公巨卿。多贈以詩文。公手爲編訂。而成是集也。已佚。

留真誌感圖題辭一卷。魏煜編。煜於道光己亥守巴州。其母迎養在署。忽思歸。乃爲延工寫真。遣妻及弟侍之行。甫兩月。署燬於火。煜及眷屬負重傷。一孫女死焉。衣服什物。蕩然一空。煜痛念道遠。不克奉顏色。所繪像復並燼也。力疾起。發焦土。竟得之。喜甚。乃請歸養。不許。未幾。母訃至。煜大痛。抱像而泣。聞者哀之。

爲作留眞志感圖。一時題詠甚衆。輯爲是集。內有林則徐題辭。選入題詠。
暖泉詩文一卷。知州靳榮藩著。榮藩字价人。乾隆時以進士守蔚州。多惠政。簿
書之餘。嘗以詩文爲縣諸生倡。書佚。慶志選集中記三首。詩十五首。詩附入山
川古蹟諸志。

金石

萬全縣 銅洗三。銅壺一。民國十八年。發現於三區富農窰村北假糧堆內。此
堆舊傳係檀道濟伐魏遺跡。尙有銅劍二口。上鑄大宋字樣。已爲駐軍攜去。
洗壺。現由農會保管。清創建永豐堡水母宮碑。乾隆四十九年立。石碑記
稱永豐堡西。舊有溫泉。張家口上下堡皮行。賴以浴皮。此泉冬溫夏寒。清漣
濯垢。北口皮貨。因以馳名。

文載藝
文篇

安維峻摩巖題詩。安維峻字曉峯。甘肅

人。清光緒時。官御史。因彈劾慈禧太后。被遣戍張家口。此摩巖。在賜兒山雲泉寺後巖上。

蔚縣 安南古塔。縣南有漢時安南古寺。寺前有安南古塔。塔基高一丈二尺。

徑一丈三尺。塔共十三層。塔頂花鐵球。共高六丈有奇。作六角柱狀。簷角各置鐵馬。金河寺鎮山塔。北魏文帝時建。塔共七十二座。形狀方圓不一。羅

列山間。在金河口峪。鐵十八羅漢。明宏治十八年。比邱元宗置。各重三十餘斤。在五台山下院。興善寺內。金劉慶善造經幢。石高三尺。徑如之。八面

刻正書九行。泰和三年立石。在城南大探口石佛寺。畿輔通志已載元趙孟頫書

楊氏先塋碑。石高九尺六寸。寬三尺二寸。書二十二行。行二十八字。額篆題

蔚州楊氏先塋八字。至治元年立。在城東麥子疇村。畿輔通志已載全明

蘇志皋草書石碑。石高七尺。寬三尺七寸。草書七行。計一百零九字。有額及陰側。在城內玉皇閣。

宣化縣 遼石經幢。幢底係八角座。座上爲八角柱。高六寸五分。周圍六尺五寸。刻有八仙人。柱上爲蓮花瓣。瓣上又爲八角石柱。高三尺八寸。周圍五尺二寸。上刻經文真書。遼咸雍十年造。劉林豐撰字。丁選書。在城南大田窰村。

延慶縣 銅玉皇天尊像。明崇禎十五年。蔣有進鑄造。高四尺。在玉皇閣。銅菩薩像。年月無考。高四尺。寬二尺五寸。在縣城北街廟內。銅香亭。明萬曆六年造。二層。高七尺餘。在永寧城內玉皇閣前。銅佛坐像。年月無考。高四尺。寬二尺。在民衆教育館內。應夢寺洪鐘。明嘉靖二十八年造。楷書。十八行。高五尺。口徑四尺。在應夢寺內。應夢寺鐵鐘。清康熙二年造。楷書。九十

六行。高四尺二寸。口徑四尺。在應夢寺內。詹天佑銅像。在青龍橋車站。大

總統徐世昌撰碑。

文載藝文篇

白塔寺石幢。楷書。行書。篆。古文。三體書。年月無

考。高三尺。直徑一尺四寸。在白塔寺山門前。居庸關雲臺。俗名過街塔。元

泰定三年建。洞口約一丈六尺。餘刻四大天王像。其餘佛像甚多。有五種文

字。一說六種。但據畿輔通志所定及拓本真跡。實爲五種。高約三丈五尺。寬

約八丈。在居庸關城內。石牌坊。年月無考。坊額書泮宮二字。石質漢白玉。

高一丈四尺。寬二尺二寸。在居庸關南門外孔廟內。關王辭曹操書碑。明

正統十四年。崔魏書。楷書。十六行。高三尺。寬二尺二寸。在居庸關關王廟。

八角碑。年月模糊。書體有藏文。遼文二種。高三尺。寬尺餘。在永寧城內顯化

寺。玉皇廟記碑。明弘治丙辰年建。王紀撰。鄒健書。楷書。十九行。高三尺三

寸寬一尺八寸。在孤峯山玉皇廟。虛閑禪師道行志碑。元至元丙戌年建。

孟祥撰。并書。楷書。三十二行。高二尺。寬三尺。在寶林寺。全文別載 藝文篇 建修顯

化寺碑。明正統十三年建。胡濙撰。羅亨信書。楷書。十九行。高八尺。寬二尺五

寸。在永甯城內顯化寺。重修廟學碑。明成化二年建。李夢陽撰。李體嚴書。

楷書。十六行。高八尺。寬二尺。在永甯城內聖廟。碑文 多 創立永甯縉山書院

碑。清道光二十六年建。梅曾亮撰。李菡書。楷書。十七行。高六尺。寬二尺三寸。

在永甯高小學校。全文別載 藝文篇

陽原縣 破地獄陀羅尼石幢。遼天慶五年十月。沙門法芽建。楷書。梵書兩種。

或曰即契丹文。高三尺。徑尺餘。八角形。在縣城大覺寺。畿輔通志 已載 觀音院石

幢。係漢譯女真文。香幢石質。八稜。中段有字處。高二尺七寸五。下有座。上有

蓮花台。台中有徑寸之孔。備焚香用。八面皆刻女真文。側註漢文佛經語。其首一面上書佛頂尊勝陀羅尼幢。鬪賓沙門佛陀波利奉詔譯。無年代。現在南糧莊觀音院中。龍王廟石幢。石高二尺一。徑九寸。八稜體。上刻漢字。大

準提陀羅尼。並大輪真言。及無量威德自在菩薩勝妙力真言等字。餘刻女真文。無年代。現在南糧莊龍王廟中。金王元德墓誌。明昌元年立石。方廣

二尺許。呂貞幹撰。王鉉書。墓誌中稱元德爲弘州襄陰縣人。卽今之陽原縣也。現存縣城聖母廟。畿輔通志已載 聚聖巖碑。金泰和七年建。蔚州觀察判官許

節撰。宏州劉徽猷書。石瑩如鏡。碑陰有公牒文。押襄陰縣印。印方僅寸五六

分。在盤崖寺。拙公禪師塔柱。金泰和四年建。柱周圍皆書佛號。在坊城堡

華巖寺。永泉寺石匣蓋。金大定十一年造。刻漢文佛經。長寬各三尺。在下

辛莊。

涿鹿縣 盜甲戰衣刀鏑。邑人閃煜龍。清嘉慶時。在湖北與匪作戰所用。

懷安縣 昭化寺碑。明正統十年建。巡撫羅亨信撰。總督劉瑾書。并篆額。額題

敕賜昭化寺碑六字。碑文備述控制西北鎮衛塞垣之意。俗稱透明碑。現在

城內昭化寺。

全文別載
藝文篇

赤城縣 東巡使者梁雲構題石。石高尺許。闊一尺九寸。刻五律二首。在靈真

觀。西蜀陳新甲題石。石高一尺二寸。刻五律二首。明崇禎乙亥年刻。在靈

真觀。浙東鄭汝壁題石。石高二尺四寸。闊一尺五寸。刻七律一首。右題曰

冬日陪吳侍御祝雲州。小憩靈真觀。明萬歷辛卯年刻。在靈真觀。巡按直

隸監察御史吳禮嘉題石。石高二尺六寸。闊一尺四寸。刻五律一首。右題靈

真觀三字。在靈真觀。 祁真人志誠道行碑。元李謙撰。兀都台書。高一丈一尺。寬三尺八寸。楷書。一千九百五十八字。在靈真觀。 石竹葉碑。石紋墨色。橫斜繪竹。枝葉悉備。有掩映之致。陰陽如一。在靈真觀十天君廟前。 宣大閱邊巡按御史吳亮題石。石高六尺。闊二尺五寸。刻七律一首。明萬曆己酉年刻。詠溫泉。在湯泉。 左巡按直隸監察御史孫賢題石。石高四尺八寸。闊二尺。陽刻雲根二字。大徑尺餘。行書。右刻明萬曆十四年歲次丙戌夏四月。右陰刻曰龍沙官此者古有望雲之感。乃獨把酒賦詩。殊無落花之意。亦奇興也。因志之。詩師漫識。又曰同登是臺者。新參府也。書皆行草。字徑二尺許。在湯泉。 寒谷溫泉題石。石高七尺。闊二尺二寸。上刻楷書寒谷溫泉四字。大徑尺許。右刻武陵順山姚學閔。左刻分巡道兵備使王。分巡道兵備僉事。

劉葵分巡口北左參將麻承萬歷己卯仲秋同作在湯泉。湯侍御過溫泉記碑石高五尺闊一尺八寸上刻溫泉記款識刻巡按宣大監察御史陽羨湯兆京書字徑五分許在湯泉。重修湯泉碑清順治戊子總督耿燁立石字徑八分楷書在湯泉。方觀承題石石高三尺闊一尺七寸刻五言古詩一首字徑寸餘楷書款識刻清乾隆戊寅初秋遊赤城溫泉二泉直隸總督桐城方觀承作在湯泉。查官正題石石高三尺三寸闊二尺三寸刻七絕一首款識刻鵬邑查官正題無年月在獨石口。吳亮登獨石亭題石石高五尺四寸闊二尺三寸陽刻五律四首右題重九日登獨石亭左刻萬曆己酉年宣大閱邊巡按御史吳亮書字徑寸許陰刻孤根柱漢四大字徑尺餘左刻庚午初春左定城司蜀人李師盛書在獨石口。飛翠摩空題石石高

五尺。闊二尺二寸。陰刻飛翠摩空四字。清王秉璋重修獨石亭所建。又一石高一尺六寸。闊二尺二寸。刻五古一首。在獨石口。龍門峽題石。楷書朔方屏障四大字。又楷書雄峙畿輔三路咽喉八大字。字均大如屋。年代無考。在龍門峽。滴水崖刻石。一峯孤立。名東天柱。上刻天柱二字。徑二丈餘。崖在鷓鴣堡。畿輔通志已載又崖下鑿石如門。左刻關外名山四字。右刻壁立萬仞四字。徑大丈餘。又崖下刻滴水崖三字。徑幾丈。款識刻明萬曆五年分巡口北兵備參政安肅汪汝梅書。又真武廟旁。刻峯巒如畫四大字。無款識。以上俱在滴水崖。

寶昌縣 元重修廣國禪寺佛殿碑。在左翼牧場西。鑲黃旗牧場界。慶國禪寺廢址內。共字二十一行。上刻致和元年興和路寶昌州字樣。字跡漫漶。不易

察哈爾省通志 卷十一 四一
辨識能識者計一百二十四字。現在鑲黃旗牧場內。元寶昌州初建接官廳記碑。字跡剝落。尙可辨識者計二十三行。四百七十七字。民國十四年在九連城廢址發現。

附記


以上所列金石。係選取各縣採訪。確有其物。且於歷史藝術有關係者。其散見他書。而原物業已不存。或與歷史藝術毫無價值。概未列入。

萬全縣南朝銅洗銅壺




金石第一圖

延慶縣青龍橋詹天佑銅像




金石第二圖

涿鹿縣清閃煜龍盔甲刀鐧



金石第三圖

萬全縣賜兒山雲泉寺摩巖




金石第四圖

蔚縣元趙孟頫州楊氏先瑩碑


奉大夫趙孟頫為文并書
楊侯既瑩其曾祖以下三世
如龜碑高三尺廣四尺其長
許有石如碑高廣皆龜稱海
將刻諸石為余言如此余至
以哉於是復徵其行事得久
皮草興碾磴者民錢五萬
龍池以給安平溝郊缺以道
事畚鍤以為民倡故雖功大

延慶縣居庸關元雲臺五種文字石刻之一




金 石 第 六 圖

延慶縣居庸關元雲臺五種文字刻之二



金石第七圖

延慶縣居庸關元雲臺五種文字刻之三




金 石 第 八 圖

延慶縣居庸關元雲臺五種文字石刻之四



金 石 第 九 圖

延慶縣居庸關元雲臺五種文字刻石之五



金 石 第 十 圖

延慶縣寶林寺元虛閒禪師道行志碑

鄭重京西禪林開師道風命遠福之方
 龍隱自樂天真矣居日謂門人白世緣
 乎遂示微疾吉祥而逝即中統四年三
 閏世二十僧蠟五十度明資口十餘俗
 以長壽石寶林惜夫師之去世二十餘
 而師終追遠者唯提點僧本敬愍先師
 本以無期繇是命工構祖師廟繪達磨
 具義置威光堂功既告成祈余為記余
 一恣非矜已能而法時流之譽不期然
 而已矣
 元丙戌三月十七日提點比丘本敬立
 法孫性妙司立
 析津秦德進

金石第十圖

延慶縣顯化寺明胡澗撰顯化寺碑

勅賜顯化禪寺之旨
資德大夫正人上
嘉議大夫巡撫大
宣德五年春正月
宣宗皇帝以永寧為口外要地特
勅內官谷春同太監亦三保都指
城垣保障具奏本年六月
損復以石包脩完固乃於城
殊警覺伽藍寺後送寺供奉
新脩蓋殿宇廊廡伽藍方丈
值甚崇為住持正統八年九
欽差中官阮葵齋
勅到營協同守備復令僧眾建盃
共覩春等踴躍灌斝具事狀
邊陲上祝
皇圖華因下而生靈祈福榮公住
皆仰給於谷公是皆宜書垂

延慶縣永寧鎮清梅會亮撰山書院碑

記之。余惟學校之事所以養人才
之根柢。詩書禮樂為之範圍。誠意
貫基於此。自叔世學校漸廢。教澤
構精舍為群居講習之所。而書院
而使虛無寂滅。隱怪荒唐之學咸
化悍俗。若與漢文翁之治蜀者相
靈秀於山川。資賢哲以陶鑄。行見
自任其嘉。其哲嗣能承父志。特書
上元梅會亮撰
實取李函書

延慶縣永寧鎮明李夢陽撰廟學碑

貫親民之地郡縣得人則國家得人
 秋行事無位考德問業群居
 廷欽洽大端至重之所左哉又進邑
 悅後定嚮應謀款新之相率出資力
 材鳩立誣日興作既度戴經文
 靡不完具彩繪煥然製稱其度是後
 又乃書狀檢記其成噫嚴廟祀使大
 嚴既有文和之資集來游來敢相規
 善矣故為書其實且以志茲學嗣
 成也
 二年冬十月吉旦
 翰林院編修長沙李夢陽謹

金石第十圖

幢石遼院音觀莊糧南縣原陽





圖 五 十 第 石 金

陽原縣南糧莊龍王廟遼石幢



金石第六十圖

懷安縣昭化寺明羅信撰化昭寺碑



金石第七十圖

